

# PROVERBIOS

## Jawen unanmati janchaki

Proverbiosdan, unanepakatsi ikin tapinti jancha kayabiki. Tsuada jaskai jiwei pepakatsi ikin Proverbios una anua tapintidubuki.

---

### Unanepan jancha kushipakidi Salomónen yusinikiaki, na janchadan

**1** <sup>1</sup>Davidin juni bake Israelin enabu xanen ibujaida Salomónen yusinti jancha <sup>2</sup>jawenabun tapintidubuwen taexun yusinkubainikiaki, eska jatu yuikinan.

Yusinti inun, unanepati inun, medabewakin tapinmati jancha ninkai jau pekubainunbun inun,

<sup>3</sup> yusinti inun, pe shinanmati inun, chanima padantima inun, jawa chakabuwatima inun, unanuma jiweti inun, bebunkidi jin jin ikama yui pewati jau pejaida tapinkubainunbun inun,

<sup>4</sup> jawada bebunkidi unandiabuma tapin jau unanepaxanunbun, bedunanbu shinanmati inun ninkaisbuma nemati jatu tapinmakin jawen yusinti jancha Salomónen jawenabu jaskawen jiwigidubu jawenkenenika jatu kenemaxuniaki.

<sup>5</sup> Yudabu unanepa inun tapinjaidanikatun yusian ninkakin ana unanepajaidakin dasibi jaska tapinkubainmis shinankin ana xabakabi tapintidubuki,

<sup>6</sup> unanepabun yusinti jancha inun, jabun jaska miyuiwen yusinmisbu inun, jabun junea jancha ninkakin pewakatsis ikinan.

<sup>7</sup> Jehová duawakin jaki datekin jawen jancha ninka pewakin

unanepakin tapin taewabaintidubuki.  
 Jakia tsuada unainsmapabun  
 unanepati inun yusinti jancha pepa dananmisbuki.

**Salomónen jawen bake yusinikiaki, na janchadan**

- <sup>8</sup> Epaan, min en juni bakewen taexun  
 en yusian mia yusinun ninkakin pewawe.  
 Min ewan yusiandi danankin ninkasyamaxanwen.
- <sup>9</sup> Min epan yusinti inun min ewan yusinti min jeneama  
 jawen min jawenduai mia uintidubuki,  
 teuti inun maiti jawenduaajaida min sawea keskadan.
- <sup>10</sup> Juni chakabubun mia padankatsis ikaibu  
 jawa jatu ninkakin chibanyamaxanwen.
- <sup>11</sup> Tsuanda mia yuikin: “Nukube kawe.  
 Jawa shinanma jatu padantan tsuada tenanun bukanwen.  
 Jawa nuku chakabuwamabia juai  
 dainbainkin detenun bukanwen.
- <sup>12</sup> Juni mawa maiwabu main xeamis keska jatu wakin  
 junibu jiweabu jatu tenankin nun jatu yamawaxanaii.
- <sup>13</sup> Jatu jaska watan jatun mabu yumetsuxun  
 mabu betsapa pepa bitan  
 nukun jiwe tibi nun mata watiduki.
- <sup>14</sup> Jaska wai min nukube ka  
 jawada bitan mibetan jabiaskas nun paxka pewakubainxanaii”,  
 akin mia yuiaibu jatun jancha ninkama dananxanwen.
- <sup>15-16</sup> Min en bakewen taexun epaan, chakabu chibanyamaxanwen.  
 Tsuada jawaida tenankatsis ikaibube jatun bai chibain jatube  
 kayamaxanwen.
- <sup>17</sup> Isa peiyabun uiain bedubi bidun wankinan,  
 jamen amisbuki.
- <sup>18</sup> Jakia ja juni chakabubun jatu tenankatsi ikin  
 bidunwan keska wakinan,  
 ibubis jatun jiwea mese wakin amisbuki.
- <sup>19</sup> Jabunan, kemukin mabu besti jatu padantan bikubainaibu  
 ibubis jaska kemui padanananmisbuwen taea  
 jawen jenei mawa bestixankanikiki.
- Unanepatun jatu tapinmakatsi jatu kenamisbukiaki, na janchadan**
- <sup>20</sup> Mae namakis bai tibi jaxpa inun jaxpama anuxun  
 unanepabun jatun jui jatu ninkamakin

- <sup>21</sup> mae janu jikikainti xui inun janu ichamisbu anuxundi  
jatun yusian jatu yuikubainkin:
- <sup>22</sup> “Bedunan jawa tapindiabumaan,  
jawa unanma besti jiwenun ika jaska bechipai  
man jatuki kaxeai inun unanepati jancha man dananmisdan,  
¿jatian man jenexanai?
- <sup>23</sup> En matu yusiaín ea ninka pewai bekanwen.  
En matu nemaya man ea ninka pewaya en shinan en matu  
achimaxanaii.
- <sup>24</sup> Man ea ninkai benunbun en matu kenabia  
juxun man ea jawa ninkakatsis ikamaki.
- <sup>25</sup> Jakia jukatsi ikama  
en yusian jancha danankin  
en matu pewakatsi ikai ea anua  
man jawa tapinkatsi ikamaki.
- <sup>26</sup> Jakia ma matu anu chakabujaida juaya  
eandi en matu usanxanaii.  
Datei man mawakatsis ikaya  
en matuki kaxexanaii.
- <sup>27</sup> Mai anua niwe bei shubi shubi ibidankin  
dasibi matu datebidankin chakabuwabidankin yamawabidanaya  
datei man nuitapaya en matuwen ana jawa nuiama ixanaii.
- <sup>28</sup> Ja xaba jaskaitian tsuanda ea kenabiaya  
en jawa jatu kemama ixanaii.  
Jabun ea benabiai jawa eki nukuama ixankanikiki”, iwanan,  
jatu ana yuikin:
- <sup>29</sup> “Unanepati jancha danankin  
jabun Jehová jawa duawakatsi ikabumaki.
- <sup>30</sup> Jatun shinan en jatu pewamakatsi ibia en jancha danankin  
en jatu yusian ninkakatsi isbumaki.
- <sup>31</sup> Jatun jiweawen shinan chakakin chakabu tibi amisbuwen taea  
nuitapai bika tenekubainxankanikiki,  
jatun chakabu ichapa yaniwa keskaidan.
- <sup>32</sup> Jawada pepa betsapa tapinkatsi isbumawen taea  
jabun jawa unanma mawaxankanikiki.  
Jawa yusian pepawen niusbumawen taea  
unainsmapa mawai yamaxankanikiki.
- <sup>33</sup> Jakia jabun en yusian ninka pewakubainaibu  
unanuma jiwekubainxankanikiki,  
jawada chakabu mese juaya dateamadan”, anikiaki.

**Unanepaidan, jabiawen pepai jiwekubaintidubukiaki, na janchadan**

- 2** <sup>1</sup>Epaan, min en juni bakewen taexun  
en jancha ninkatan jakimama  
en yunuti inun en nemati jancha chibankubainxanwen.
- <sup>2</sup> Unanepabun mia yusiain ninka pewakin  
chanima jancha tapintan jakimama  
jaskai jiwekunkainxanwen.
- <sup>3</sup> Jaskai min unanepatidu inun  
min jawada pejaida unanti watidu tapinkatsidan,  
min kushipa jidabiwen Dios yukakubainxanwen.
- <sup>4</sup> Pei inun mabu pepa junea binun, iwanan,  
benamisbu keska wakin  
unanepati jancha tapinun, iwanan, benajaidakubainxanwen.
- <sup>5</sup> Min jaska benaiwen taea  
jaska Jehová duawai min dayaxuntidu inun  
min jakidi tapinkin unanjaidaxanaii.
- <sup>6</sup> Jehován yusian tsuanda pe tapinkubainkinan,  
jaska unanepatidu inun jaska betsapakidi tapinjaidatidu  
Jehován yusinkin jatu inanxanikiki.
- <sup>7</sup> Tsuanda jawa kaneama inun jawa chanichakama  
pepa besti jiwekunkainaidan,  
Jehován medabewakin jatu mekekubainmiski.
- <sup>8</sup> Tsuanda jatu padainsma inun  
Jehován jancha ikunwain chintuinsma  
Diosun jabu yaushikin mekekubainmiski.
- <sup>9</sup> Pepai jiweabu Jehován jatu mekekubainmiswen taexun  
miadi jawa chanichakama inun jawa padanananma  
dasibi min pe besti jiwekunkainai min tapinxanaii.
- <sup>10</sup> Unanepa jancha unankin tapintan  
min juinti medan min benima chakayamaxanaii.
- <sup>11</sup> Jawada bika jawaida tapintan jakimama  
min bebunkidi pe shinankubainaya  
tsuan mia padantiduma ixanikiki.
- <sup>12</sup> Diosun shinan min tapinjaidaiwen taea  
junibu chakabu anua inun  
jiwei peabuma anua unanepai min piskukaintiduki.
- <sup>13-15</sup> Diosun mia mekeaya  
tsuada jawen jiwea bai pepa jenebaini kaima  
bai atimapá yushtu keska chibankin  
daketapai chakabu mei beyuskin  
yuda betsaa isin tenemai

junibu chakabu nawai besi atimapai bu keska  
min jawa jatu chibana ma ikunkainxanaii.

**16-17** Diosun mia unanepa waya  
chipash Diosbe yubakatan beneyabiani  
Dioskidi jakimatan jawen bene ma jenebainima  
min jakidi jawa unanma  
ja ainbu jininipatun jancha jawenduawen  
mia jawen kemumakin mia yubakatsi ikaya  
pe shinankubaini chakabukatsi ikama  
min jawaida putabaintiduki.

**18** Ja ainbu jininipatun jiwe anu tsuada kaidan,  
ja baiwen yuda mawai bumis keskabuki.

**19** Jawen jiwe anu jikitan ana chintunkidantidubumaki,  
jawan jiwea bai pepa ana bechitan chibana madan.

**20-21** Jakia tsuabunda jawa kaneama  
inun jatuki chanichakama  
pe besti jiwekubaini  
na mai anu jiweyukubainmisbuwen taea  
miadi pe jiwekin bai pepa chibankubainxanwen,  
pepabun amisbu keska akubainidan.

**22** Jamen jabu padanananmisbu inun  
junibu chakabukubainmisbu  
miban betsea keska wakin Jehován jatu udenxanikiki,  
na mai anu ana jatu jiwemamadan.

### Unanepai jau unanuma jiwekunkainxanun yusinikiaki, na janchadan

**3** <sup>1</sup>Epaan, min en juni bakewen taexun  
en yusinti jancha tapintan jawa jakimayamaxanwen.  
En yunuti jancha inun en nemati jancha shinankubaini

<sup>2</sup> benima besti min jiwei chaipakunkainxanaii.

<sup>3</sup> Dasibibuwen nuikunkaini  
chanima jancha jawa jeneyamakubainxanwen.  
Teuti sawea keska wa jatuwen nuikin chanima jancha sawewe,  
min shinan uke medan netankinan.

<sup>4</sup> Min jaska jiwekunkainaya  
Dios inun yudabu miwen benimakin mia  
bechipaikubainxankani kiki.

<sup>5</sup> Jaska ibubis min unanepaiwen akama  
jakia min juinti jidabiwen Jehová ikunwankin  
jaska mia yusia in besti chibankubainwen.

<sup>6</sup> Jawada dasibi Jehován bechipaiai shinankin

min akubainaya Jehován mia tapinmakin  
jawen bai pepa mia yusinkubainxanikiki.

<sup>7</sup> Iubis kein: “En unanepajaidaki”,  
iwanan, shinanyamakubainxanwen.

Jakia Jehováki besti datekin ja besti duawai  
chakabu tibi jene keyutan ana meyamakubainxanwen.

<sup>8</sup> Jehová besti min duawakubainaidan,  
dau pepa min xea keska waya  
min yuda kushipakunkainxanikiki.

<sup>9</sup> Jawada dasibi mabu min jaya  
inun min miban ja dukun bimi taeai tsekaxun  
Jehová duawakin ja dukun inankin jawen kenwankubainxanwen.

<sup>10</sup> Min jaska wakubainaya  
min piti aduti jiwe anu min piti mata wakin  
min uva vino aduti mai kenti shumu ewapabuki  
mata wakin mia bupakemaxunxanikiki.

<sup>11-12</sup> Jawen juni baken kaneaya  
jawen epan tapinmakin yusinkubainmis keska wakin  
tsuabuda Jehován jatu bechipaiai kaneaibu  
jatu nemakin pewakubainmiswen taexun  
epaan, min kaneai Jehován mia pewakin bika tenemaya jawa  
dananyamakubainxanwen.  
Jawen kushipawen mia yunukubaina  
jawen jancha bikabiaken ninkaxunkubainxanwen.

<sup>13-14</sup> Plata mane juxupa inun  
oro mane ichawai jawen pepabiaibun  
jakia tsuada unanepai ninkanikakin  
oro inun plata binumakin  
dasibi ninkakin tapin keyutan  
jawen benimakin jatu binukubainxankanikiki.

<sup>15</sup> Jawen dauti inun  
meichikiti inun pau inun  
teuti pepajaida kadujaida jayabiabun  
tsuada unanepakin  
ja mabu jawendua bechipajaidakin bimisbudan,  
pepabia unanepatun jawen jatu binujaidatiduki.

<sup>16</sup> Unanepawenan, ainbu duapa keskakin  
nekedixun min jiwea chaipa mia inanyan  
ukedixun mabu pepa inun yudabun mia duawakubainai

- min jaska jiwekunkaintiduki.
- <sup>17</sup> Unanepa jancha chibainan, benimakunkaini inun unanepa bai tanabaini unanuma min jiwekunkainxanaii.
- <sup>18</sup> Tsuanda unanepa jancha tapintan chibain jawen jiwetidubuki, pe mekei benimakunkainidan.
- <sup>19</sup> Jawen shinan unanepawen Jehován mai inun nai dami watan mesterwaniki.
- <sup>20</sup> Jawen unanepajaidawen shinantan ianenwan paxkatan nai kuin anua basnun taxnimakin taewaniki.
- <sup>21</sup> Epaan, min shinan pepa adutan jadatuda pepa inun jadatuda chakabu unanti tapintan jawa jakimayamakunkainxanwen.
- <sup>22</sup> Jaskakunkainkin Diosun bechipaiai teuti jawendua teua keska min jawen pe jiwekunkaintiduki,
- <sup>23</sup> jaki chiti itan jawa dateama kai ana kane taskamadan.
- <sup>24</sup> Shinan pepai inun unanepai jiwekunkaini janu min juindukuaintian jawa dateama inun janu min uxaitian unanuma min dakatiduki.
- <sup>25-26</sup> Jehováki min chiti ika jatun jawen pepawen mia inankubainxanikiki, babui min jawen dateyamanunan. Janua jawada mesejaida juaitian mia mekekin nemaxuna ja mesen mia achiama ixanikiki. Ja inun, junibu chakabu mibe jiweabu jatu kupikin yamawaya min jawa dateama ikunkainxanaii.
- <sup>27</sup> Tsuada jawa jayamatun medabe mia yukai min axuntidu jatuki chikishama axunkubainwen.
- <sup>28</sup> Tsuanda medabe mia yukai ikis min axuntidu jawa meshukidi manama jawaida axunwen.
- <sup>29</sup> Mia bechipaikin mikidi pe shinanmisbu mia dapi jiweabuki jatu chakabuwanun ixun yubakakin shinanyamaxanwen.
- <sup>30</sup> Tsuada miki sinatakin mia chakabuwamabia eiskaun jatube detenameti shinain sinatayamakunkainxanwen.
- <sup>31-32</sup> Junibu chakabu Jehován danankin juni pepabu bechipaikin jabu besti jaibuwamiswen taexun ja junibu chakabu jawada jaya uin jawen kemui ja keska miadi jayakatsis ikin shinanma jawen shinan keska chibanyamaxanwen.
- <sup>33</sup> Jehovánan, junin chakabuwamisbun

enabu yupukin  
 jakia pepabun enabu  
 jatu duawakubainmiski.

- <sup>34</sup> Jabu kaxekenanmisbu  
 Jehovádi jatuki kaxediamiski.  
 Jakia jawa keinsbuma  
 Jehován jatu duawakubainmiski.

- <sup>35</sup> Unanepabu duawakin  
 ichapabun jatu kenwanxankanikiki.  
 Jakia unainsmapabu danankin  
 tsuan jatu kenwanma ixankanikiki,  
 jatukidi chakabu besti yui janchaidan.

**Jiwea pepa jau chibankubainunbun jatu yusinikiaki, na janchadan**

## 4

- <sup>1</sup> Epaan, man en juni bakebuwen taexun  
 en yusian pepa tapinkin  
 en jancha ea ninkakin matun jiwea pewakubaikanwen,  
 jawada pepa inun jawada chakabu unanti wakinan.
- <sup>2</sup> En yusian pepa en matu yusinkin pewaidan,  
 jawa jakimakin jamakidi shinanyamaxakanwen.
- <sup>3</sup> Eadan, en jatun bakedi iniki.  
 En ibu ainbun ea bechipaikin duawakubainaya
- <sup>4</sup> en ibu junin ea yusinkin yuikin:  
 “En mia yusiaín shinain  
 en jancha jakimayamaxanwen,  
 jaska en mia yunuai keska aki  
 min pe jiwekunkainxanaidan.
- <sup>5</sup> Unanepai inun shinan pepa bestinun, iwanan,  
 en yusian jancha jakima taskayamaxanwen.
- <sup>6</sup> Unanepa kayabi tapinkin bechipaikin jeneyamawe.  
 Min jaska waya jatun mia mekexun unanmakubainxanikiki.
- <sup>7</sup> Jamapai betsa min adiamá  
 ja dukun unanepa inun jawada pejaida  
 min unanti watidu tapintan  
 ja shinankin chibankubainxanwen.
- <sup>8</sup> Unanepati mian min bechipaiaya  
 unanepan mia kenjaida wadixanikiki.
- <sup>9</sup> Maiti jawendua keska mia sawematan  
 unanepan mia duawakubainxanikiki”, ea wa en ninkadianiki.
- <sup>10</sup> Epaan, en yusian jancha ninkakin tapintan  
 ana badi ichapa min jiwekunkainxanaii.

- <sup>11</sup> Unanepa jancha en mia yusia inwenan,  
jawen en mia iyu pewaxanaii,  
bai pepa mia chibankakinan.
- <sup>12</sup> Jiwea bai pepa min chibain  
tsuan mia nematidumaki.  
Ja jiwea pepa chibain jin jin ikama inun  
jawa idabiakaini kanei min jawa juti ikama ixanaii.
- <sup>13</sup> En yusinti jancha dananma mestenwantan  
jakimakin jeneama chibain min pe jiwekunkainxanaii.
- <sup>14</sup> Juni chakabu ikaibu jatuki dasitan  
jatun chakabu chibankin jatubetan meyamaxanwen.
- <sup>15-17</sup> Jabu juni chakabubun jawada chakabuwadiama  
pe shinain daka tidubumaki.  
Yuda betsa jawa kanemadiama shinain uxatidubumadiki.  
Jatu detekin itimaska wakin  
jabun jatu chakabuwaibu  
jatun piti inun jatun nuxutidan,  
chakabu besti kainmamisbuki.  
Jatu dunkekin jenebaini jatukidi ana jawa shinanma  
pe besti ikunkainxanwen.
- <sup>18</sup> Juni pepabu jawen jiwea jawenduai  
penai xabai taeitian  
badi kaikidani badi manananbi daka  
chaxa chaxa ichakayamai keskai  
ana pejaidakubainmisbuki.
- <sup>19</sup> Jakia junibu chakabu jiwekubaini  
meshu medan kai jawa unanma  
jawadaki juti imisbu keska  
jaska wakin chakabuwakin kaneaibu tsuan unanbumajaidaki.
- <sup>20</sup> Epaan, min en bakewen taexun  
pesxun en yusian ana ninkakin pejaida wawe.
- <sup>21-22</sup> Min ekidi tapiain min yuda jawa isin teneama  
en yusian shinain min jawen jiwekunkaintiduki.  
Jawa benuama jakimama shinankin  
min juinti uke medan en yusian netan pewakubainwen.
- <sup>23</sup> Jaskakin jiwea kayabi min bitiduwen taexun  
jawada betsa mai anua min bechipaiai  
binumakin min shinan pe mekekubainxanwen.
- <sup>24</sup> Chanichakakin min yuiadan, chakabujaidaki.  
Ja jenekin jaska ana shinanyamakubainxanwen.

- <sup>25</sup> Juni chakabubun betsa betsapa jaikaimas shinanmisbu inun  
tsuanda mia uintiduwen taea  
jatuki jawa dateama jadidi min kai  
chintuanma pe besti shinankubaini jiwekunkainwen.
- <sup>26</sup> Jaska jiwekainkin janida min kai  
bebunkidi shinan pewawe.  
Jaskai bai tanai nixun  
chakabuwakin min kanetidumaki.
- <sup>27</sup> Kanekin bai chakabu chibunun, iwanan, shinanma  
pepas chibankin jeneyamakubainxanwen.

**Ainbu chakabukidi yusinikiaki, na janchadan**

- 5** <sup>1</sup>Epaan, en unanepa jancha ninkaidawe.  
Jaska ean en tapini miadi yusinun pesxun ea ninkawe.
- <sup>2</sup> Na jabiatian jaska tapintan shinan pewai  
unanepan jancha unantan min jawen janchaxanaii.
- <sup>3</sup> Eska mia yuinun ea ninkawe.  
Ainbu jawendua beneyabia kemui jawen jancha kemutapatunan,  
piti xeni pepa min bechipaimis keskatun binutiduki.
- <sup>4</sup> Jakia jawen jiwea chakabu eskaki.  
Tsuada ja ainbu jaska padanananmis  
jawen jancha ana jawenduama  
ni pei mukajaida keska inun  
nupe kenu dabeya keskawen jatu mexteabu  
isinjaidamisbu keskaki.
- <sup>5</sup> Ja ainbun jatu iyukinan,  
jau jabe mawai kanun jatu iyumiski,  
jawa jatu niti akama janu mawa maiwamisbu anu jatu iyukinan.
- <sup>6</sup> Ja jiwea kayabi baiwen kai jawa pe shinanma  
jawen jiwea mestenmawen taea  
jawen nuitiduma inun jawa unanmaki.
- <sup>7</sup> Jaskawen taexun epaan, en jancha ea ninkatan  
en yusinti jancha jawa jeneyamakubainxanwen.
- <sup>8</sup> Ja ainbun jiwea anu jadi min kemashinken
- <sup>9</sup> jaska min jiweawen badi ichapa daya chakayamakunkainkin  
min mabu ichawakubainaya  
nawa betsa jawa miwen nuiama  
miki sinatakin mia mebintiduki.
- <sup>10</sup> Jaskaken dasibi min daya pei inun jawada min dayaima  
jau nawa betsan biyamaxanun  
ja ainbu chakabu anu jawa jadi kemayamaxanwen.

- <sup>11</sup> Jakia en jancha danain ainbu chakabu anu min kakunkainmis  
atimas min jiwea keyui  
min yuda unanxubida babukunkainkin
- <sup>12</sup> januxun ibubis shinain: “Ea yusinkin nemabiabu  
¿jaskakin jatun yusian en danankubainimamen?  
Ewen nuikin ea nemabiabu ¿jaskakin en jatu ninkama  
ikunkainimamen?
- <sup>13</sup> Juni yusinanbun ea yusianbu en jatu ninkama ikimaki.  
Janua ea unanmabiakubainabu en jatu danainmaki.
- <sup>14</sup> Enabu dasibibun ea uiainbun  
chakabu mei en jawen benui pemajaidashina shinain en dakejaidaii”,  
iwanan,  
“Aitin ichakayamakin min yuikubainxanaii.”
- <sup>15</sup> Jakia en jancha ninkakubainwen.  
Jaskawen taea min ainan, chacha unpax pepa jabai keskaki.  
Chutanamekatsi ikin min unpax manuai keskakinan, min ain besti  
chutakubainxanwen.
- <sup>16</sup> Unpax pepa bai namaki jukakin chakabuwa keskakin  
ainbu betsawen kemukin mekin  
min juda chaka wama min ain besti chutakubainxanwen.
- <sup>17</sup> Min ainan, mina bestiki, betsanamadan.  
Jau juni betsan min ain chutanun  
min ain yunuama mina besti wakin chutakubainxanwen.
- <sup>18</sup> Chacha unpax pepawen kemukin nun bechipaimiski.  
Min ain bedunantun min biai  
Diosun mia inani jabe mia duaya  
jabe besti benimakunkainxanwen,  
ja chacha unpax min bechipaimis keskaidan.
- <sup>19</sup> Chaxuwan bake jawendua pishta keska  
min ainin yuda jawendua min bechipaiai  
mia damanbauna jinin bitan benimakin  
ja besti chutakubainxanwen.
- <sup>20</sup> Epaan, ¿jaskai jawa shinanma  
ainbu juni betsanawen min kemukunkainai?  
¿Jaskakin ainbu min ainma  
ikutan jawen chuchu damankin min mekubainai?
- <sup>21</sup> Juni tibi mapuxun akubainaibu  
jaska akaibu Jehován uinkin  
jawa jakimama shinankubainmiski.
- <sup>22</sup> Juni chakabun ibubis jawada chakabuwamisdan,

jawen yuda chakabun achitan  
dispiwen neakin akawamamisbuki.

<sup>23</sup> Janua nemati jancha tapisanma  
danamisbuwen taea mawa kayabimisbuki,  
patapa ninkaismajaida benuidan.

**Juni betsan pei bianyukatsis ikai betsan  
medabewatimakiaki, na janchadan**

**6** <sup>1</sup>Epaan, nawa anua min jaibun jawen pei bianyukatsis ikaya  
medabewakin nawa min yuixuna pei inainmaxun  
chipu nawan jawen pei mia yukatiduki,  
min jaibun pakamawen taexunan.

<sup>2</sup> Mian yunukin min janchawen yubakin  
ibubis min kaneimawen taexun mia ma achiaki.

<sup>3</sup> Epaan, jaskatun ma mia achia kainkatsidan,  
ibubis nawa pakakatsi ikama min jaibu eska wawe.  
Jadakidida min jaibun mia jancha chakabuwatidu dateama  
jawaida min jaibun jau pakanun  
ja bebun ka danti ixun yukakin ea a chakayamawe.

<sup>4</sup> Uxadiama inun jawa juindukuanmajaida

<sup>5</sup> chaxu piayabuki datei paxamis inun  
peiyabu bidunki datei paxai tuyakainmis keska kain  
min jawaida pewatiduki.

**Chikishbu jaska yusianwen yusintikiaki, na janchadan**

<sup>6</sup> Chikishbuun, ea ninkakanwen.

Unanen jawen piti adumis buxun uintankanwen.  
Jaska wamisbu uinkin shinankin  
jabun dayakidi tapinkanwen.

<sup>7</sup> Ja unan xanen ibooma inun jatun yununika jayamabia  
ibubis shinain dayachayamisbuki.

<sup>8</sup> Badian jatun piti bitan bitankin  
jatun kini anu adukin mata wamisbuki,  
yudabun jatun yunu tsekaxun adumisbutianan.

<sup>9</sup> Chikishbuun, jaskaida ana uxayamakanwen.  
Man uxadan, ¿jatian bestentan man benia?

<sup>10</sup> Uxa paen matu achia tinintantani  
¿xuikukui petan besti man uxakatsis ikai?

<sup>11</sup> Chikishi man jawa dayamawen taea  
jawa jayama man nuitapakunkainxanaii,  
juni daya jayabuman matun mabu matu bianbaina keskaidan.

**Juni chakabubun jatun akadan, eskakiaki, na janchadan**

- <sup>12</sup> Juni chakabubun jatu chakabuwamis pe shinanma  
chanichakakin chani besti jatu yuibaunmisbuki.
- <sup>13</sup> Jatun shinan chakabu jatu unanmakin jau chakabuwanun bun  
beduwen jatu yuikin jatu xechiku akin inun  
jatun taewen jatu timakin inun  
jatun metutiwen jatu metukin jatu unanmamisbuki.
- <sup>14</sup> Jatun shinan chakabuwen taea  
shinan chakabuwakin jaska shinankubainmisbuki,  
jau detenamenun bun jawada juni betsan jakidi chakabu yuixu  
jatuki chanikin jatu sinatamaidan.
- <sup>15</sup> Jaskamisbuwen taexun jabu kupikinan,  
chakabujaidawen jatu bika tenemakin  
jawaida betsupe ika keska wakin  
jatu chakabuwakin yamawakin keyuxanikiki,  
jawawen ana kayatima jatu wakinan.

**Eska tibi Jehován dananchakayamamiskiaki, na janchadan**

- <sup>16</sup> Chakabu betsaa betsapa akin 6 kasmai 7ki amisbudan,  
Jehován jatu uin bechipaiama dananchakayamai  
jatuki sinatajaidamiski.  
Jaskakidi matu yuinun ea ninkakanwen.
- <sup>17</sup> Ipubis kenmisbu inun,  
chanichaka bestimisbu inun,  
jawa chakabuwamabiaken  
jatun mekenwen jatu tenanmisbu inun,
- <sup>18</sup> jawen jatu chakabuwanun ika  
juni betsaki yubakamisbu inun,  
jamapai chakabuwaibu jatu medabewanun ika  
kushibainmisbu inun,
- <sup>19</sup> juni betsan chakabuwaxu jatun jawa uianmabia  
chanichakai xanen ibuki chanimisbu inun,  
betsabu jau sinatanamenun bun  
jatu chaniwen padanmisbu  
jabu dasibidan, jatuki sinatakin  
Jehován jatu kupixanikiki.

**Ainbu min ainma chutakatsi shinantimakiaki, na janchadan**

- <sup>20</sup> Epaan, min en bakewen taexun  
min ibu juni inun min ibu ainbun yunuti inun nemati jancha  
chibankin

- nukun yusian dananyamakubainxanwen,  
shinankubaini jawa jakimamadan.
- <sup>21</sup> Teuti teua keska wakin  
min juinti anu netantan jakimayamakunkainxanwen.
- <sup>22</sup> Jatunan, janida min kai mia mekexun iyukin  
janu min uxai anu mia mekeia inun,  
uxa min besteanyan ana mibe janchai keskakin  
mia shinanmakubaintiduki.
- <sup>23</sup> Chanima ja yunuti jancha inun ja yusinti janchadan,  
min kai anu bin ewapa dekua chaxa keskaki.  
Min kaneai nemakin mia pewaibu inun jawen shinanmati jancha  
mia yusiaibnu  
chibain jiwea kayabi min jayaxanaii.
- <sup>24</sup> Jaska inun, ainbu betsa chakabu  
juni tibibe chutanamemisbun jancha jawenduawen mia  
padantidububia  
nukun yusian jancha shinantan min jawen nematiduki.
- <sup>25</sup> Ja ainbu jawenduaturtun mia uinkin mia kemumabiaya  
jawen yudawen kemukin shinanyamakubainxanwen.
- <sup>26</sup> Ja inun, ainbu jininipa beneumatunan,  
chutanamekin jawen piti besti benai yukamisbuki.  
Jakia ainbu beneyatun jawen bene padantan  
juni betsa chutamatanan,  
min jawada mia keyu biantiduki.
- <sup>27</sup> Juni betsan chi deken ikuadan,  
jawaida jawen tadi menumiski.
- <sup>28</sup> Ja inun, juni betsan chi dekenki paia  
jawaida jawen tae menuidiamiski.
- <sup>29</sup> Jabiaskadiai juni betsan ain beneyabiaken  
jabe chutanamemisdan,  
chanima jawen kupiti bixanikiki,  
chi deken ikua keskaidan.
- <sup>30</sup> Juni betsan bunijaidakin pinun, iwanan,  
piti yumetsutan piken jawa jaki sinatativaki.
- <sup>31</sup> Jakia june yumetsuaya bechitan achiabu  
ja junin jawada jatuna yumetsuxudan,  
jau 7ki jawen mabu jau ana ibu inan keyununwen,  
dasibi jawen jiwe anu mabu jawada jaya inan keyukinan.

- <sup>32</sup> ¡Jamen unainsmapatunan,  
ainbu beneya tsuanda chataidan,  
ibubis jawen jiwea chakabujaidawaikiki!
- <sup>33-35</sup> Jawen benen yaushikin unantan  
jaki sinataidan, chi keskaki.  
Ma chakabuwakenan,  
janchawen inun inankuinti ichapawen  
tsuan nemakin daewatidumaki.  
Jawen chakabu bene jakimakatsi ikama  
dete dete akin dake watan nichinxanikiki.

**Ainbu beneyabiatun mia chutamakatsis ikai  
unanmatikiaki, na janchadan**

- 7** <sup>1</sup> Epaan, en jancha ninkakin  
en yunuti jancha shinaindakubainxanwen.
- <sup>2-3</sup> Jaska min bedu yaushikin min pe mekemis keska wakin  
en yunuti jancha inun en yusinti jancha  
min meken anu dispiwen nea keska wakin  
min shinan uke medan netan pewatan  
shinankubaini min pe jiwestiduki.
- <sup>4</sup> Unanepa janchakidi shinankin:  
“Unanepa janchawen min jawen janchatidudan, min pui keska  
wawe.  
Jawaida tapintikidi shinanan,  
min jaibu ainbu keska wawe.
- <sup>5</sup> Min jatu jaska wadan, ainbu beneyabun jancha jawenduawen  
mia chutamakatsi ibiaibun  
unanepati jancha inun jawaida tapinti shinan  
min jayawen min paxatiduki.
- <sup>6</sup> Xaba betsation en jiwe janu uinti xui bepenxun june en uiyanan  
<sup>7</sup> bedunanbu jawa shinan pepa bidiabuma ea dainbainaibu  
jatube bedunan betsaa unainsmapajaidadi kai en bechia
- <sup>8-9</sup> ma badi kai meshuaya ja bedunan bai tanabaini  
bai betsaa ketanbaini kapukebaini  
ainbu padanananikatun jiwekidi kayanbis kaya
- <sup>10</sup> ja ainbu jawen jiwe anua ja bedunanki nukunun ika  
taxnikidani jawen bachi inun jawen besu jawendua  
jininipa beneuma keska
- <sup>11</sup> bebunkidi jawa shinanma jawaida janchai  
inun jawen jiwe anu dayaisma
- <sup>12</sup> mae ewapa anu bai inun plaza bai kexa tibi anu nikunkainkin

ja dukun juni juai achikatsi manakubainmis ja bedunanki  
nukutan

<sup>13</sup> ikuxun jantsu jantsu atan jawa dakeama yuikin:

<sup>14</sup> 'Jaska en yubakashina

ikis en yushin dios daewati ina xeni en jatu kuamakin keyuxuki.  
En ma piti jayaki.

<sup>15</sup> Jaskawen taea miki nukunun ika en taxnikidanaii.

Jaska bechitanun ika jukidan en ma miki nukuxuki.

<sup>16</sup> Egipto anua tadi jawenduawan

en dakati bebekankin pewatan

<sup>17</sup> mirra inun áloe inun canela xeni injaidawen en cha abidanxuki.

<sup>18-20</sup> En bene janumaki. Nanta chai kashianki.

Pei ichapa bushianwen taea uxe babekediamaken

chintundiamawen taea

en jiwe anu kananwen, jadia penadiama

meshu jidabi chutanamei bechipainamei

nun benimanunan', akin

<sup>21</sup> jancha jawenduawan yuikubainkin jeneama

ja bedunan jawen shinan betsa wa

<sup>22</sup> ana jawa shinanma jabe ja ichun kaimaki.

Ina awa tesenun ixun jawa unanma

dispiwen nexaxun ninibainkin iyumisbu keska inun

chaxu bidun medan jikia

<sup>23</sup> pia kuinwen tsakakin pishchakax amisbu keska inun

peiyabu jui jisin chaipa bidunwanbuki jikimisbu keskaidan,

ja bedunantun ainbu jininipa chibain

mawai kaikiki, jawa unanmadan.

<sup>24</sup> Jaskaken epaan, ea ninka pewakin

en jancha shinankubainxanwen.

<sup>25-27</sup> Ja ainbu jininipan jiwe anu kai

jawen bai tanabaini ichapa mawamisbuki.

Ainbu jininipan jatu iyuxun chakabuwaya

juni ichapa ma debuabuwelen taexun

jaska ainbu jininipan jatu amisbu shinankin

miandi kanei jachun kayamaxanwen,

ja baiwen kai mawai benukatsi ikamadan", anikiaki.

**Unanepan jatu tapinmakatsi jatu kenamiskiaki, na janchadan**

## 8

<sup>1</sup> Ja unanepa jancha juni keskatun  
jawen jancha taxnimakin jatu tapinmakatsi ikin jatu kenamiski.

- Ja tapinmanika jancha juni keskatun  
jawen jui kainmakin jatu ninkamamiski.
- <sup>2</sup> Unanepa jancha inun tapinmanika janchan jatu ninkamamisbuki,  
manananxun inun bai kapukea anu niti ixun yuikinan.
- <sup>3</sup> Mae ewapa mishki kenebaunibu  
jikiti xui jawen beputi anuxun  
jatun jui ninkamakin jatu yuikin:
- <sup>4</sup> “Junibuun, matu inun matun bakebu anu en matu jancha waii.
- <sup>5</sup> Man bedunan jawa tapindiabuma inun unainsmapabuun,  
jaskai man unanepatidu inun man ninkanikatidu ea tapinkanwen.
- <sup>6</sup> Jancha pepa putatima jatun en matu medabewatidan,  
en eaki. Ninkakanwen.
- <sup>7</sup> Jaska en matu yuiai chanimaki.  
Chani jancha yuiaibu en bechipaismaki.
- <sup>8</sup> Dasibi en janchadan, yui kayabiki,  
jaska en matu yuiai en kanetidumadan.
- <sup>9</sup> Jabun ichapa xabakabi tapintidubu inun  
xabakabi ninkatidubunan,  
en janchadi xabakabi pepa ninkakin  
jawa en kaneama ninkamisbuki.
- <sup>10</sup> Ja dukun benakinan,  
yusinti kayabi inun tapinti kayabi  
benakin tapinkubainkanwen.  
Jaska min tapiainan, mane plata inun  
mane oro bechipaibiamisbu binujaidaki.
- <sup>11</sup> Unanepati janchadan,  
jawen jiwei pejaidakunkainkin  
jamapai mabu nenkati jawendua kushipajaidabiaken binuaki.  
Jamapai mabu shadabu jaya man jawen kemubiamis  
ja unanepati janchan dasibi binuaki.
- <sup>12</sup> Ea juni keskai unanepa janchakin yuikin:  
Ea unanepadan,  
en jaibu tapinjaidanikabe en jabe ketaxameaki.  
Jabe medabenain en jawa adiam  
nuku dabe yubakakin pe shinantan  
pejaida nun yusinmiski.
- <sup>13</sup> Jehováki datekin duawakubainkinan,  
chakabu danain min jaki sinatatiduki.  
Eanan, nati chakabu en danamiski:  
ibubis keainbu inun, ja:  
En ean besti jamapai unan keyuaii, imisbu inun,

- jiwe chakakubainmisbu inun,  
 chanichakakubainmisbu ean en jatu dananajaidamiski.
- <sup>14</sup> Chakabu unanti wanika inun  
 pepa unanti wanika kushipadan, en ea bestiki.  
 En unan keyuaiwen taexun  
 bebunkidi jawada en akatsis ikai yubakatan  
 en akubainmiski.
- <sup>15</sup> Ewen taea xanen ibui kushipakin  
 jatunabu xanen ibuxunkin pe jatu yunukubaintidubuki.
- <sup>16</sup> Ewen taea mai pakea anua  
 xanen ibubu inun, jatun bakebu inun, xanen ibu bexmasbun  
 jawada pe inun jawada chakabu  
 jatunabun akaibu pewen besti jatu yunukin unanti watidubuki.
- <sup>17</sup> Tsuabunda ea bechipaiaibudan,  
 eandi en jatu bechipaimiski.  
 Tsuabunda ea benai eki nukumisbuki.
- <sup>18</sup> Ea benakin ea shinainbu  
 pewen jatu manakukin jatun jiweti mabu pepa  
 inun benimai jiweti en jatu inankin duawamiski.
- <sup>19</sup> Ea ninkakin tapiaibudan,  
 pejaidawen en jatu manakukin inankatsis ikaidan,  
 ja oro mane jas inun plata mane jas binujaidaki.
- <sup>20</sup> En ea unanepa kaidan,  
 bai pepa yustumawen kakin  
 jawa jatu kanemama yunuti kushipa  
 en jatu unanti wamakubainmiski.
- <sup>21</sup> Tsuabunda ea bechipaiaibudan,  
 jawena en inaiin, jamapai pepa bitan  
 jawen jiwe anu adukin jau ichawaxanunbunan.
- <sup>22</sup> Jehován mai inun nai dasibi  
 dami wakin taewadiama  
 ea dukun ea taxnimaniki, en unanepadan.
- <sup>23</sup> Mai dami wadiama ea dukunjaida ea dami wakin taewaniki,  
 jawa mai anu betsa taxnidiamajaidatianan.
- <sup>24</sup> Ianenwan tibi jayadiama inun,  
 jene tibi inun janua chacha beai unpax tibi jabadiama  
 ea dukun taxnimatan Jehová ea jayaniki.
- <sup>25</sup> Mati keyatapa inun mawa tibi dami wadiama  
 ea dukun taxnimatan Jehová ea jayaniki.
- <sup>26</sup> Ja mai jidabi anu bai wati tibi inun,  
 ja mai mishpu bitan mai jidabi ja dami wani adiamabia

- ea dukun ea taxnimaniiki.
- <sup>27</sup> Natukan nai naman ianenwan dami wadiamaken  
ja bebun ea dukun en jayai taeniki.
- <sup>28</sup> Nai anu nai kuin dami wadiama inun,  
ianenwan janua jene taxniai dami wadiama inun,
- <sup>29</sup> ianenwan kebenkin jawen kesua kexa tibi pewadiama inun,  
mai jaki dakati pewadiama
- <sup>30</sup> eadan, jabe ketaxamekunkaini  
jawa paxkama Jehovábe ea unanepa janu en jabe iniki.  
Ewen benimakunkainaya  
Jehová bebunua badi tibi jawa paxkama  
jabe benimai en beyuskunkainiki.
- <sup>31</sup> Diosun junibu bawaiwen taea  
jabu shinain jatuwen en benima chakayamakunkainiki,  
mai jidabi jiwmashinawen taea jaki beyuskunkainidan.
- <sup>32</sup> Ea unanepa en matun epa keskaki.  
Natian ea ninkaidakanwen.  
En akubainmis ea chibain  
man benimakunkainxanaii.
- <sup>33</sup> Ea unanepakidi en matu yusiai ninkakin tapinkin  
ea dananyamaxankanwen.
- <sup>34</sup> Eadan, en bepenmanaki.  
Tsuabuda ea anu juxun  
dasibi en yusian badi tibi ea ninkakubaini chintuanma  
en jatu mekea jaya jabun ea ninkai benimakubainxankanikiki.
- <sup>35</sup> Tsuanda ea benai eki nukutanan,  
jatun jiwea kayabi bixankanikiki,  
jaska Jehován bechipaimis chibamiswen taexunan.
- <sup>36</sup> Jakia tsuanda chakabuwakin  
kanetan ea jenebainidan,  
jawen jiweadan, ibubis chakabuwaxankanikiki.  
Jatun ea danainan,  
jawen mawa bechipaikiki.”

### Unanepa inun unainsmapakidi yusinikiaki, na janchadan

**9**

- <sup>1</sup> Unanepan jawen jiwe wakin  
7 chibu jawendua nichinkin kushipa watan
- <sup>2</sup> januxun bedunanbu jatu yusinun, iwanan,  
piti jawendua tibi jatu pimakatsi jawen ina detexun  
januxun ja nuxuti vino pepa pewatan jakixun piti  
tapu jatu pewaxuntan

- <sup>3</sup> jawen tsumabu mati mapetan  
 mae ewapa anu jiweabu jatu  
 sai akin eska jau jatu yuitanun yuikin:
- <sup>4</sup> “Bedunan tapinsbuma inun unainsmapabuun,  
 nedî bekanwen.
- <sup>5</sup> Piti en matu pewaxunxu inun  
 vino pepa en matu pewaxunxu  
 pikin nexui bekanwen.
- <sup>6</sup> Tapinjaidanika jancha ana dananma  
 tapinjaidatan jiwekubainkanwen,  
 jaska tapinjaidai jiwemisbu keskai jiweidan, jatu atankanwen”, aka buxun
- <sup>7</sup> tsuada medabewakatsis ikin jatu pewabiabu  
 juni chakabubu jawaida sinatamis  
 jawa jaska tapinkatsi ikama  
 jaki jancha chakabujaidai  
 jaki kaxe bestitidubuki.
- <sup>8</sup> Jabu kaxei jawaida sinatamisbu nemakin  
 min jatu tapinmapaia  
 miki sinatakin mia danan bestixankanikiki.  
 Jakia juni unanepa nemakin min tapinma  
 shinan pewatan miwen benimatiduki.
- <sup>9</sup> Jamen juni unanepa min yusian ninkakin tapinjaidai  
 ana unanepa chakayamaxanikiki.  
 Juni pepa min yusian mia ninkatan ana ichapa tapinxanikiki.
- <sup>10</sup> Unanepai taekinan, Jehová ja dukun ninkatan duawakubaintiki.  
 Dios medibi pepajaida min unainan,  
 jawaida tapinika min ikunkaintiduki.
- <sup>11</sup> Tsuada ewen taea unanepaidan,  
 jawen jiwea badi ichapa jiwexanikiki,  
 Diosun ana jiwemakubainadan.
- <sup>12</sup> Mia min unanepadan,  
 jiwei pekin pepa besti min bikubainaii.  
 Jakia patapai min ninkaismamisdan,  
 jadan minaki, chakabudan,  
 min jawa biama ixanaidan.
- <sup>13</sup> Tsuada ninkaisma patapadan,

- ainbu chakabu unainsmapa  
jawa unanma chani besti yuimis keskaki.
- <sup>14</sup> Mae ewapa mananan anu  
jawen jiwe beputi anu xabakan tsauti anu tsauxun
- <sup>15</sup> junibun jawa shinamma  
jatun shinan pepawen bai tanabaini buaibu  
ja ninkaisma patapa ainbu keskatun jatu kenakin:
- <sup>16</sup> “Bedunan tapindiabumaan,  
nedi bekanwen”, akin  
jabun pe shinanbuma jatu yuikin:
- <sup>17</sup> “Unpax yumetsutan akadan, pejaidaki.  
Misi junexun piadan, nuejaida min unaiin”,  
akin jatu yuia
- <sup>18</sup> ja ainbu keskatun jatu kena bumisbudan,  
jabu unainsmapabu jadi pe dabanen mawa kayabi anu buaibu jawa  
unanbumaki.

**Salomónen yusinti jancha kene pewakubainibukiaki, na janchadan**

# 10

<sup>1</sup> Salomónen unanepa jancha ninkakanwen.

Jawen bake unanepatun jawen epa benimawamisbuki.  
Jakia jawen bake ninkaismatun  
jawen ewa kaxamakin punu nuka wamisbuki.

<sup>2</sup> Mabu besti ichawakin jatu padantan ichawaidan,  
jawen pe jiwtidubumaki.  
Jakia jaska Diosun bechipaiai pepa besti chibankubainmisbudan,  
mawa kayabi anu kama piskutidubuki.

<sup>3</sup> Juni pepabu buniaibu  
Jehován medabewakin  
jatu piti inankin bunimamamiski.  
Jakia juni chakabubu jawada piti pepawen kemuaibu  
Jehován jatu yaniwamaismaki, kupikinan.

<sup>4</sup> Tsuada eskadabes dayamis  
jawa jayama nuitapakubainmisbuki.  
Jamen tsuada daya chakayamamisbudan,  
dasibi jayakubainmisbuki.

<sup>5</sup> Unanepabun mibanxun  
badi tibi jushiain tsekaxun

- jatun jiwe anu adumisbuki.  
 Jakia miban biaimaxun  
 tsuada jaki pechitan biama benushinadan,  
 chipu nuitapai ea iki dakemisbuki.
- <sup>6</sup> Juni pepabu jatun pepawen Diosun jatu duawamiski,  
 jawen pepawen manakukinan.  
 Jakia juni chakabun bemakis jatu pewabiakin  
 uke medan chakabu shinain jatube detenamemisbuki.
- <sup>7</sup> Juni pepa uinkin Diosun duawamis  
 betsabun jawen pepa shinankin jakimaisbumaki.  
 Jakia juni chakabukidi jawaida jakimamisbuki.
- <sup>8</sup> Unanepabunan, yunuti jancha pepa  
 jawaida ninkamisbuki.  
 Jakia jabu patapakin jancha chakabu yuimisbudan,  
 jawaida chakabui benuxankanikiki.
- <sup>9</sup> Tsuabuda pe jiwekin  
 jawa chakabu meisbuma  
 jawaki dateama unanuma jiwekubainmisbuki.  
 Jakia tsuabunda chakabu mekin junebiamisbu  
 jatun chakabu xabakabi bechitan jatu dake waxankanikiki.
- <sup>10</sup> Tsuanda juni betsa padanmakin  
 beduwen jatu unanmakin  
 jatukidi xechiku amisdan,  
 unantan jatu ichakawakin jatu nuitapawamisbuki.  
 Unainskapatun pe shinanma  
 jawaida jatu jancha yuibauni chanikaunmisdan,  
 jawen chakabuwen taexun  
 jakidi pe shinanma jatu ichakawaxankanikiki.
- <sup>11</sup> Juni pepabun yusinti jancha pepawen medabewakin  
 Diosun jiwea kayabikidi jatu tapinmakubainmisbuki.  
 Jakia juni chakabun bemakis jatu pewabiakin  
 uke medan june shinan chakakin  
 jatu chakabuwamamisbuki.
- <sup>12</sup> Dananankunkaini sinatanamei detenamemisbuki.  
 Jakia juni nuikipanan, jawada chakabuwashinabu

jatu daewatan jatun chakabu jakimawatidubuki.

<sup>13</sup> Unanepa janchakinan,  
jancha unanepa yuimisbuki.  
Jakia tapin pewaisbuma  
unainsmapatun jawen jancha pe mekeama  
chakabu yuaibuwen taexun  
danain jaki sinatakin jatu kakush kakush amisbuki.

<sup>14</sup> Unanepabun jawen unanepati jancha mekekin  
jawaida yuisbumaki.  
Jakia unainsmapabun jatun jancha jawaida yuikin  
mese wakin jatu sinatamamisbuki.

<sup>15</sup> Juni mabuyabunan, tsuanda jatu chakabuwaibu  
jawen peiwen pakakin jatu nematidubuki.  
Jakia nuitapaibu tsuanda jatu chakabuwabu  
jawaumawen taea jatu nematiduma jawawen paxatidumaki.

<sup>16</sup> Juni pepabu dayakubainaibu  
manakuti pepa bitan jiwea kayabi jayaxankanikiki.  
Jakia juni chakabubu daya peama kanemisbudan,  
jatun manakuti bidan, chakabui pikumisbuki.

<sup>17</sup> Tsuanda kaneaibu pe jatu yusianbu ninkamisbudan,  
pe jiwxankanikiki, jawa benuamadan.  
Jakia pepa jatu yusianbu danankin ninkaisbuma  
jatun jiwea benuxankanikiki.

<sup>18</sup> Chanichakamisbu june mia danain sinatabiai  
mia jawa yuiamaki.  
Jakia unainsmapabu tadi janchabiaibun jawenamabia  
dasibi ikaibukidi jatu yuibaunmisbuki.

<sup>19</sup> Tsuanda jawada tibikidi yui jancha chakayamakinan,  
kanekubainmisbuki.  
Jakia unanepabudan, mawaida janchaisbumaki.

<sup>20</sup> Juni pepabun janchadan,  
mane plata kadu pepa keskaki.  
Jakia juni chakabubun shinanan,  
jawa pemajaidaki.

<sup>21</sup> Juni pepabun jawen janchawen jatu yusinkin  
ichapa jatu tapinmamisbuki.

Jakia juni unainsmapabun  
pepa shinankin katutiduma mawamisbuki.

<sup>22</sup> Jehován tsuada jatu duawakinan,  
mabu pepa ichapa keska jatu inankin benimawamiski,  
jawa jatu bika tenemakin isin tenemamadan.

<sup>23</sup> Juni unainsmapatun chakabu tibi wakubaini  
jawan besti benimakunkainmiski.  
Jakia juni unanepa jawen unanepawen benimamiski.

<sup>24</sup> Juni chakabubu jawada judiamabiaken  
jaki datejaidamisbu jatuki nukuai mexankanikiki.  
Jakia jawada juni pepabun jaska bechipaimis uinxankanikiki.

<sup>25</sup> Niwe kushipajaida shubi shubi ibidakin  
juni chakabubu yamawakin keyuxanikiki.  
Jakia juni pepabunan, jawa meama  
jawama jiwekubainxankanikiki.

<sup>26</sup> Juni chikishbu jawen tsumapan jatu yunubia axuainsmadan,  
bimi bunkash piabu jatun xeta maxex wakin  
chakabuwamis keska inun,  
chi kuinman jawen bedu jatu bechexkin  
chexanwanmis keskabuki,  
tsuan jatu bechipaimadan.

<sup>27</sup> Jehováki datekin duawakubainaibu jatun jiwea chaipa jayayuxankanikiki.  
Jakia juni chakabubu jatixunda jiweama ixankanikiki.

<sup>28</sup> Juni pepabun jatun manakuti pepa juaya bi benimaxankanikiki.  
Jakia juni chakabubun jatun manakuti pema juaya  
benu bestixankanikiki.

<sup>29</sup> Jehován jatu mekekinan,  
jabun pepa wakubainaibu jatu mekemiski.  
Jakia jabun chakabuwakubainaibudan,  
Jehován jatu kupikin yamawamiski.

<sup>30</sup> Juni pepabu jatun jiwea

betsa taska kane jayama ixankanikiki.  
 Jakia juni chakabubu na mai anu jiwei ikibi ikama  
 ixankanikiki.

- <sup>31</sup> Juni pepan kexa anua jancha unanepa taxnimiski.  
 Jakia jabun chakabu yuikubainmisbu  
 kupikin jatun jana mextea keska wakin  
 jatun nesewaxanikanikiki.
- <sup>32</sup> Juni pepabun jawada pepa yuikin jabun ninkaibu jatu  
 benimawakubainmisbuki.  
 Jakia juni chakabubun yuikin  
 atimapa jancha besti yuikubainmisbuki.

**11** <sup>1</sup> Jawen pisatiwen tana pewamadan,  
 Jehován danankin bechipaimski.  
 Jamen jawen pisatiwen tana pewamisdan,  
 Jehován bechipaimski.

<sup>2</sup> Tsuada ibubis kenbiamis  
 jawada chakabu ashian taxniaya dakexanikiki.  
 Jakia jabu ibubis jawa keinsbumadan,  
 unanepaki.

<sup>3</sup> Juni pepabun jatun beya pepa tapintan chibamisbuki.  
 Jakia juni chanichakamisbun  
 ibubis chakabuwakubaini  
 jawen chani janchawen taea yamamisbuki.

<sup>4</sup> Jehován janu unanti wakin jatu kupaitianan,  
 tsuada mabu ichapayabia  
 jawa jatu medabewatidumaki.  
 Jakia tsuada jawen yunutiwen padanananma ikunkaina aidan,  
 mawa kayabi anua Jehován jatu paxawaxanikiki.

<sup>5</sup> Juni pepabun kaneaibun  
 ja yunuti pepatun jatun shinan  
 jatu kayatapinmakubainmiski.  
 Jakia juni chakabubun kanekin  
 jatun chakabuwen ibubis ana pikumisbuki.

<sup>6</sup> Juni pepabun yunuti pepa shinain chakabu anua paxamisbuki.

- Jakia padananain juni betsan jawada bianun ika jawen  
 kemumisbudan,  
 jatun chakabudan, jawen yabukua keskaki.
- <sup>7</sup> Jamen juni chakabu jiwexun  
 jamapai tibi ichawanun ixun shinanbiamisbu  
 mawai jakimai dasibi keyuxanikiki.
- <sup>8</sup> Juni pepabu tsuanda jatu bika tenemaibu  
 Diosun jatu paxawakin medabewatan  
 januxun juni pepatun xantukun juni chakabu  
 Diosun jatu bika tenemamiski.
- <sup>9</sup> Juni chakabun jabe jiweabu  
 jawen jancha bestiwen jatu nuitapawamisbuki.  
 Jakia tsuabuda jatu ichakawabiabu  
 unanepa janchawen pepabu  
 ibubis mekei paxatidubuki.
- <sup>10</sup> Juni pepabun jatun daya pepawen jamapai ichawaibun  
 mae anu jiwea dasibibu benimakubainmisbuki.  
 Jamen chakabubu mawaibun  
 mae anu dasibi jiweabu benimai besimisbuki.
- <sup>11</sup> Juni pepabun jatun janchawen jatu medabewakin  
 jatun mae pewakin ewawakubainmisbuki.  
 Jakia juni chakabubun jancha chakabuwaiwen taea  
 jatun mae chakabuwaya  
 yudabun jenebainmisbuki.
- <sup>12</sup> Pe shinainsbuman jatun jaibuuibuki jancha chakabumisbuki.  
 Jakia unanepabudan, jaska shinain janchaisbumaki.  
 Pes bestikubainmisbuki.
- <sup>13</sup> Juni chanikepatun jawa juneama  
 dasibi jatu yuibaunmisbuki.  
 Jakia juni pepatun jawada june ninkatan  
 jawa jatu yuiama mekekubainmisbuki.
- <sup>14</sup> Xanen ibu yununika pepamaken  
 ja chibain jawenabu babui petidubumaki.  
 Jamen xanen ibun jatu meke pewakinan,

jawen medabewanika unanepa ichapabun medabewakin  
yusin pewabu jatu ninkatan  
jawenabu jatu piskumatiduki.

<sup>15</sup> Juni betsan jatu pei bianyukatsis ikai inanbumaken  
tsuanda yubatan inanmainmadan, jadan, nuitapaxanikiki.  
Jakia tsua jaska shinanmakin amaismadan,  
unanuma jiwestidubuki.

<sup>16</sup> Ainbuabu duapa pepabu  
bechipaikin jatu kenwankubainmisbuki.  
Jakia tsuada yudabuki jawa dateama  
jawen jancha kushipawen jatu mesewatan  
pei ichapa bi bestimisbuki,  
tsua jatu kenwanmamadan.

<sup>17</sup> Tsuada nuikipakin jatu medabewamiswen taea  
ibubis pe jiwekunkaindiamiski.  
Jakia tsuada jatuki sinatai jatuwen niusbumawen taea  
ibubis jiwe chakadiakubainmisbuki.

<sup>18</sup> Junibu dayachakamisbu manakukinan,  
padan bestixankanikiki, jawa pe inanmadan.  
Jakia tsuada padanananma pepa wakubainmisbudan,  
jawen manakuti pepa inanxankanikiki.

<sup>19</sup> Yunuti jancha pepa kushipa chibankubaini  
jiwea kayabi anu kaxanikiki.  
Jakia chakabu akaibu chibainan,  
jawen taea mawa kayabi anu kaxanikiki.

<sup>20</sup> Tsuanda chakabu besti wanun, iwanan, shinanmisbu  
Jehován jatu bechipaama dananmiski.  
Jakia tsuanda jawa chakabu meisma  
pe besti jiwekubainmisbu  
Jehován jatu uin benimajaidamiski.

<sup>21</sup> Chanima kayabi juni chakabubu  
janu jatu kupiaitian jani paxatidubumajaidaki.  
Jakia pepabu jawa jatu kupiama  
jawama kainbaini paxaxankanikiki.

- <sup>22</sup> Ainbu jawenduabia jawa tapinkin  
pe shinainsmadan, jamenki,  
ina yawa jawendua wakatsi  
ja mane oro meichikiti kadujaidawen jamen  
deuwatidubu keskadan.
- <sup>23</sup> Juni pepabun jaska bechipaimis akinan,  
pepa taxnimakubainmisbuki.  
Jakia juni chakabubun jawa shinanma jaska bechipaiai  
akin jatu sinatamamisbuki.
- <sup>24</sup> Tsuabuda jawa yaushiamma jawen jawada paxkatan  
inanananmisbu  
jatu inanmisbu binumakin ichapa bikubainmisbuki.  
Jakia inanananma yaushimisbu  
jawa jayamai nuitkaamisbuki.
- <sup>25</sup> Jawada jaya yaushiamma paxkatan  
jatu inainwen taea  
jatun jawada Diosun jatu inankubainmiski.  
Tsuabunda jawen mabu jatu inanmis  
betsabun jadi inandiamisbuki.
- <sup>26</sup> Tsuabunda jawen xekiwan trigo  
jawen kadu ana xekexanun, iwanan,  
yaushiai keskakin mekekin aduyuken  
jakidi jancha chakabu yuimisbuki.  
Jakia tsuabunda jawen xekiwan trigo  
jawen kadu xekema peiwen jatu inanananmisbu  
jatu duawamisbuki.
- <sup>27</sup> Tsuanda pewen jatu medabewakin duaway  
jaska aki pe jiwea uintan bechipaixankanikiki.  
Jakia tsuabunda chakabuwakubainaibu  
jabia jawen chakabun jatu achixanikiki.
- <sup>28</sup> Mabu ichapa jaya ja bestiwen jiwenun ikubainmisbu  
ni pei xanatan nidi imis keskabuki, benuidan.  
Jakia ji jawen pei nidi iki keyubiati  
ana jukunkidanmis keskai  
juni pepabu bika tenebiati  
ana jawa teneama pe besti jiwekubaintidubuki.

<sup>29</sup> Jawnenabube jiwea medabewakin jatu pe mekeama paxkakainima jawa jayama ixanikiki.  
Janua unainsmapabudan,  
unanepabun jatu tsuma wakubainmisbuki.

<sup>30</sup> Tsuabunda yunuti pepa kushipa chibain jiwei petidubuki.  
Yuda betsa chakabubiaken  
tsuanda ja juni jawen shinan betsa wamakin  
Dios chibanmaidan, ja juni unanepaki.

<sup>31</sup> Na mai anu jiweabu pepabun  
jatun manakuti pepa biaibun  
jabun Diosun jancha ninkaisbuma inun  
chakabuwamisbu jatu manakukin  
jaska bechipaimisbu chakabuaidawen jatu kupixanikiki.

## 12

<sup>1</sup>Tsuanda nemati bechipaikin chibainan,  
jabiwendi unanepati jancha bechipaidiaikiki.  
Jakia tsuada nemakin yusinbiabu dananmisbudan,  
unainsmapa bestiki.

<sup>2</sup> Juni duapa pepabuwen taexun  
Jehován jatu duawakubainmiski.  
Jakia yusinti pe shinanma  
padananankin chakabu besti yui dakeisbumadan,  
Jehován danankin jatu kupixanikiki.

<sup>3</sup> Junibun chakabuwamisbudan,  
ja chakabunan, jawen jatu mestenwantidumaki,  
jiwe chibu jayama keskadan.  
Jakia juni pepabu jatun jiwea mestenwant  
ji tapun uke medanajida bexea keskabuki,  
tsuan jatu betsetidumadan.

<sup>4</sup> Ainbu unanepa pepatun jawen bene duawakin  
xanen ibujida keska wa jawen taea kentiduki.  
Jakia jawen ain chakabutun jawen bene duawakin medabewama  
jawan jiwea chakabuwamakin  
nuitapawamiski, ana jatu shinantima wamakinan.

<sup>5</sup> Juni pepabun jawada pepa besti akatsi ikin

- ja besti shinankubainmisbuki.  
 Jakia chakabubu padananan bestikatsi shinankubainmisbuki.
- <sup>6</sup> Juni chakabubun janchadan,  
 januxun jatu tenantu bidun keskabuki.  
 Jakia juni pepabudan,  
 jawen jancha pepawen taea  
 jamapai chakabu anua piskutidubuki.
- <sup>7</sup> Juni chakabubun kanekubaini  
 jawen jiwea bextekei mawamisbuki.  
 Jakia pepabu jatun jiweadan,  
 unanuma jiweyukubainmisbuki.
- <sup>8</sup> Tsuanda pe shinankin jawaida tapinjaidanikadan,  
 jabudan, jatu kenwankubainmisbuki.  
 Jakia tsuada tatima unainsmapadan,  
 jawa jatu kenwanma danankubainmisbuki.
- <sup>9</sup> Tsuada kenwanma dananbiaibun  
 jawen tsumapan medabewakin dayaxuna jaskai  
 pe jiwtidubuki.  
 Jakia tsuada kenwanbiakubainmisbu  
 jawen piti ichapa jayamaken pematiduki.
- <sup>10</sup> Juni pepabun jatun inabuwen nuikin  
 jatukidi shinankin pe mekekubainmisbuki.  
 Jakia juni chakabubudan,  
 jamapai tibiwen jawa nuiama  
 jakidi shinainsbumaki.
- <sup>11</sup> Juni dayakapadan, jatun bai anu miban  
 piti jamen imiski.  
 Jakia unainsmapatun jawa daya pepa akamadan,  
 jawa piti ichapa jayatidubumaki.
- <sup>12</sup> Juni chakabubun jawada chakabu bechipaikin shinanmisbudan,  
 jisin keskawen nexea jani paxatidubumaki.  
 Jamen juni pepabudan,  
 ji tapun chaipa jaya keska  
 jatun shinan pepawen kushipakin  
 pepawakubaini mestenepa jiweabuki.

- <sup>13</sup> Juni chakabubun chanichakamisbuwen taea  
ibubis jatun chakabuwen bexekea  
jani paxatibubumaki.  
Jakia juni pepabu chakabu anua kainbaini paxamisbuki.
- <sup>14</sup> Jaska juni tibi janchamisbu bixankanikiki,  
pe inun chakabu yuimisbu tibiwenan.  
Janua jaska akubaini dayakubainmisbu  
jaskawen jatu pakadan,  
chakabu kasmai pepa bixankanikiki.
- <sup>15</sup> Yusian ninkaisma unainsmapabudan,  
dasibi jawada akubainai:  
“En pe jiweaki”, ixun shinankubainmisbuki.  
Jakia juni unanepabunan,  
juni betsan jatu medabewakin pe yusiainbu ninka  
pewakubainmisbuki.
- <sup>16</sup> Juni unainsmapabu jawaida sinatakin  
jawa juneama xabakabi jatu uinmamisbuki.  
Jakia unanepabu jatu yuain jatuki kaxebiabu  
ninkabiakin jatu dabainsbumaki.
- <sup>17</sup> Juni pepabun jawada ikaibu uin pewatan  
chanima jancha besti yuimisbuki.  
Jakia juni chakabun jawada uin pewamabia  
chanichaka bestikin yuikubainmisbuki.
- <sup>18</sup> Juni betsa jawa shinanma  
jatu jancha chakabu yuikinan,  
nupewen jatu chachikin akawamisbuki,  
jawa medabewamadan.  
Jakia unanepabun jatu yusinkinan,  
jatu medabewamisbuki,  
dau pepa xeama keska wakinan.
- <sup>19</sup> Tsuabunda chanima jancha besti yuimisbudan,  
jiwei ikibi ixankanikiki.  
Jakia tsuabuda chanichakamisbudan,  
jawen jiwea jawaida keyuxanikiki.
- <sup>20</sup> Juni chakabun shinain yubakaidan,

- chanichakai padanananmisbuki.  
 Jakia tsuabuda unanuma jiwexun medabewakin  
 jatu yusiaiinbu ninkai benimamisbuki.
- 21** Juni pepatun jawa chakabuwaismaken  
 chakabun nuitapa watidumajaidaki.  
 Jakia juni chakabun dasibi chakabu betsapa amis  
 betsapa wama dasibi jaki dari wabain Diosun jatu kupia  
 nuitapamisbuki.
- 22** Jabu chanichakamisbu bechipaiama  
 Jehován jatu dananmiski.  
 Jakia tsuabuda jawa chanichama yui pewakubainaibu  
 jatu uin jatuwen Jehová benimajaidamiski.
- 23** Tapinjaidanika ibubis kenkin  
 jawada shinankin unain xabakabi jawaida jatu taxnimaxuinsmaki.  
 Jamen unainsmapabun jawa shinanma  
 jawada jancha pema yuibaunmisbuki.
- 24** Dayakapan daya pe tapintan jatu yunuxanikiki.  
 Jakia jabu chikishbudan,  
 juni betsan tsuma waxun jatu dayamamisbuki.
- 25** Tsuanda jawada bika tenejaidai uinti nishmai punu nukamisbuki.  
 Jakia tsuanda jancha pepawen bika teneaibu  
 medabewakin jatu benimawatidubuki.
- 26** Juni pepabun jabu ja dapi jiweabu  
 jatu jaibuwakin jatu yusinkin pewakubainmisbuki.  
 Jakia juni chakabubu jiwe chakai  
 bai chakabu chibain benumisbuki.
- 27** Juni chikish piaya kaxunan,  
 jawa tsakaisbumaki.  
 Jakia juni dayakapa jiweadan,  
 jamapai ichapa bitan jayamisbuki.
- 28** Yunuti pepa kushipa ja baiwen kaidan,  
 jawen jiweti jayaki.  
 Jakia unainsmapabu jiwei peisbuma  
 jatun jiwea benui mawa bestimisbuki.

## 13

- <sup>1</sup> Jawen bake unanepatun jawen epan nemati jancha ninkaxun chibankubainmiski.  
 Jakia bake jabiaska beyai ninkaismatunan,  
 jawen epan nemati jancha danankin jawa chibainsbumaki.
- <sup>2</sup> Jaska janchamisbu tibi jatun manakuti bixankanikiki,  
 pe inun chakabu yuimisbu tibiwenan.  
 Jakia juni puben detenamemisbunan,  
 ana jatu detekin chakabuwanun ixun  
 chakabu besti benakubainmisbuki.
- <sup>3</sup> Tsuanda jawen jancha mekemis ibubis meketidubuki.  
 Jakia tsuanda jamapai yui janchawanmisdan,  
 jamen jawena besti benuxanikiki.
- <sup>4</sup> Chikishbun jawada bechipaikin bikatsis ibiai jawa bitidubumaki.  
 Jakia dayakapabudan, jamapai jayakubainmisbuki.
- <sup>5</sup> Juni pepabun chani jancha dananmisbuki.  
 Jakia juni chakabubun jawada atimapa akai  
 uin jawen dakemisbuki.
- <sup>6</sup> Juni duapabu jatun pepawen mekemisbuki.  
 Jakia junin chakabuwakubainmisbu  
 jatun chakabuwen keyui yamamisbuki.
- <sup>7</sup> Juni betsabu jawa jayamabia:  
 “En mabuyaki”, iki kenmisbuki.  
 Jakia tsuada mabu ichapa jayabia xabakabi yuiana  
 nuitapai keska jiwemisbuki.
- <sup>8</sup> Yumetsubun jau jatu tenanyamanunbun  
 mabu ichapayabun jatun peiwen jatu daewatan  
 jawen jiwea piskutidubuki.  
 Jakia nuitapaibudan,  
 tsua jatuki sinatamawen taea jawa ninkama jiweabuki.
- <sup>9</sup> Juni pepabu bin chaxajaida keska benimamisbuki.  
 Jakia juni chakabubu bin nuka keskabuki,  
 jawa benima jayamadan.
- <sup>10</sup> Junibu ibubis kenkin jatu chakabuwamakubainmiski,

- jatu detenamemakinan.  
 Jakia juni unanepadan,  
 keanma yusian pepa ninkamisbuki.
- <sup>11</sup> Dayai padananantan mabu jawaida ichawamisbudan,  
 jawaida jawen mabu keyuxankananikiki.  
 Jakia tsuanda unanxubida dayakin  
 mabu ichawakubainaidan, ewawaxanikiki.
- <sup>12</sup> Jawada akatsi shinanbiaya jamapai betsawen taea tea  
 atiduma unain juinti nishmamisbuki.  
 Jakia jaska uinkatsis ikin shinankin manakamis  
 taxniaya benimamisbuki.
- <sup>13</sup> Yunuti jancha danankin pe shinanma  
 jawada kanetan aitin ichakayamatiduki.  
 Jakia yunuti jancha ninka pewatan chibankin  
 manakuti pepa bixanikiki.
- <sup>14</sup> Unanepan yusinti jancha ninkaidan,  
 jawen jiwea jayaxanikiki,  
 ja mawawen datemis piskuidan.
- <sup>15</sup> Tsuanda pe shinankin akin pewabainaya  
 junibun kenwanmisbuki.  
 Jakia padananain chanichakakubainmisbu  
 ana jaskatan petidubumaki.
- <sup>16</sup> Unanepatun bebunkidi pe shinantan jamapai amisbuki.  
 Jakia unainsmapatun jamapai chakabuwakin  
 xabakabi jatu uinmakubainmisbuki.
- <sup>17</sup> Jancha bunika chakabunan,  
 jatun jancha chani peama jatu chakabu tuxunmiski.  
 Jakia jancha bunika pepan jatun jancha pepa chanikin  
 jatu daewakin benimawamisbuki.
- <sup>18</sup> Jawen medabewati yusinti jancha tsuanda dananmisdan,  
 yumain dakekubainxankanikiki.  
 Jakia medabewati yusinti jancha tsuanda ninkamisbu  
 yudabun jatu kenwanxankanikiki.

<sup>19</sup> Jawada jaska bechipaiai akin menetanan,  
jawen benimamisbuki.  
Jakia unainsmapabunan,  
shinan betsa watan jatun chakabu jenekatsi isbumaki.

<sup>20</sup> Unanepabube jaibunantanan,  
jawen unanepa jancha min tapinkubainxanaii.  
Jakia unainsmapabube jaibunankinan,  
jatun chakabu tapinkin matun beya pepa man putaxanaii.

<sup>21</sup> Jabun chakabu mekubainaibudan,  
jatun chakabuwén betsa betsapa tenemisbuki.  
Jakia pepabunan, manakuti pepa bi jawen benimamisbuki.

<sup>22</sup> Juni pepabu mawakin  
jatun yusian pepa inun mabu pepa  
jawen bababu jenexunbainmisbuki.  
Jakia junin chakabuwamisbun  
mabu ichapa ichawashinadan, mawaya  
juni pepabun bikin ibuwaxankanikiki.

<sup>23</sup> Nuitapaibun bai anu piti jamen ibiaya  
tsuan jatu pe mekeama jatu ichakawakin  
jatun piti jamen jatu benuntidubuki.

<sup>24</sup> Tsuanda jawen bakebu bechipaimadán,  
chakabuwai jatu nemakin pewakatsi isbumaki.  
Jamen tsuanda jawen bakebu bechipaikinan,  
jatu yusinkin bebunkidi nema pewakubainmisbuki.

<sup>25</sup> Juni pepatun pikin yaniwatan  
benimai shinan chankankunkainmiski.  
Jakia juni chakabun pibiai bunikunkainmiski.

**14** <sup>1</sup>Ainbu unanepatun jawenabu tibi  
jatu pe mekekubainmisbuki.  
Jakia ainbu pe shinainsmatun  
jawenabu jawa jatu pe mekeama  
jiwe chakamakubainmisbuki,  
jiwe teke teke aka keska wakinan.

<sup>2</sup> Tsuada chanima jiwei pexun

Jehová duawakin benimawamisbuki.  
 Jakia tsuada jiwei peama kanekubainkinan,  
 Jehová danankubainmisbuki.

- <sup>3</sup> Unainsmapatun ibubis kenkin  
 jawen jancha kushipawen jatu kunyan amisbuki.  
 Jakia unanepatun jawen jancha pepawen jatu pe mekekubainmisbuki,  
 tsua sinatamamadan.
- <sup>4</sup> Ina awa jayamawen taea jatun bai anu  
 xekiwan trigo jayabumaki.  
 Jakia ina awa jawen kushipawen jatun bai anu mai xexaimaxun  
 xekiwan trigo ichapa tsekakubainmisbuki.
- <sup>5</sup> Tsuanda jawada ikaibu ibubis uintanan, chanichakama yui  
 kayabitidubuki.  
 Jakia tsuanda uianmabia kaka besti ninkatan chanichaka  
 bestimisbuki.
- <sup>6</sup> Tsuada yunua ninkaismatun  
 unanepanun ixun unanepan jancha benabiae jaki nukutidumaki.  
 Jakia ninkanikabun jancha bena tapinkinan,  
 jawa bikama jawaida tapinkubainmisbuki.
- <sup>7</sup> Unainsmapabun jancha ninkakin  
 min jawa tapintidumawen taea  
 jatube jaibunameama tadi mapukubainkanwen.
- <sup>8</sup> Juni pepa unanepatunan, jaska pe jiwtidu  
 bebunkidi unanepakin unankubainmiski.  
 Jakia unainsmapa pe jiwtiduma ibubis padanananmisbuki.
- <sup>9</sup> Unainsmapabudan, kanei kaxekenanmisbuki.  
 Jakia juni duapabudan,  
 jatube jaibunamekin jatu medabewakin  
 jatu benimawakubainmisbuki.
- <sup>10</sup> Juni tibitun jatun juintinin jawada bika teneai inun  
 jaskai benimai jamesti xabakabi unantiduki,  
 tsua jawa unanmamadan.
- <sup>11</sup> Juni chakabubun enabu chakabuwakin yamawaxankanikiki.

Jamen juni duapa nuikipabun enabu pe jiwei pakubainxankanikiki.

<sup>12</sup> Jiwei pea dabanan medabenan bestikunkaini janchai jiwemisbudan, badi jawen jeneaitian Diosun jawen juinti pema unantan jatu kupixanikiki, mawa kayabimakinan.

<sup>13</sup> Bemakis usanbiai juinti uke medan  
bika tenei jawawen jaskatima min isin tenetiduki.  
Jaskai bemakis benimabiashina  
jawen jenei kaxatidubuki.

<sup>14</sup> Jaska unainsmapabu jawen jiwea pemabiaken  
jiwekunkaini benimakubainmisbuki.  
Jakia juni pepabun jaska pe wakubainmisbuwen  
benimai shinan chankankubainmisbuki.

<sup>15</sup> Juni betsan bebunkidi tapintan pe shinainsmatunan,  
jawada yuiaibu ninkatan jawa shinanma  
jawaida ikunwanmisbuki.  
Jakia juni betsan bebunkidi pe shinanmisbunan,  
dasibi pewatan mapumisbuki.

<sup>16</sup> Unanepabu chakabuwen datekin jenekubainmisbuki.  
Jakia unainsmapabu chakabuwen dateama  
nashui ika mapumisbuki.

<sup>17</sup> Tsuabuda shinanma jawaida sinatakin  
chakabuwakubainmisbuki.  
Jakia tsuabunda bebunkidi pe shinantan  
jawaida sinataisbumaki.

<sup>18</sup> Juni betsan bebunkidi pe shinainsmadan,  
jawen unainsmapawen taea jiwei peismaki.  
Jakia juni betsan bebunkidi pe shinanmisdan,  
unanepai jiwea dasibibun uintidubuki.

<sup>19</sup> Juni chakabubun juni pepabu bebun  
danti iki beti itan jatu kenwanxankanikiki.  
Juni pepabun jiwe jikiti xui anuxun  
juni chakabubun jatu ea axankanikiki.

<sup>20</sup> Nuitapaibudan, jatun jaibuaibun dikabi jatu danankubainmisbuki.

- Jakia mabu ichapayabudan, jaibu midima jayamisbuki.
- <sup>21</sup> Jatu dapi jiweabu tsuanda medabewama danankinan,  
Diosun yusian chibana chakabuwaikiki.  
Jakia tsuada nuitkaapabuwen nuikin medabewai  
benimakunkainmiski.
- <sup>22</sup> Tsuanda chakabuwanun ixun benabaunkinan,  
bai pepa benumisbuki.  
Jakia tsuanda pepa besti anun ixun benamisbudan,  
yudabun jatu bechipaikin chibankin  
jatu jawa jeneisbumaki.
- <sup>23</sup> Tsuada daya chakayamakunkainidan,  
piti inun mabu jayakubainmisbuki.  
Jakia jawa wamabia jancha bestikubainmisbudan,  
jawa jayama nuitkaapakubainmisbuki.
- <sup>24</sup> Unanepabun jatun shinan pepajaidadan,  
maiti jawendua sawea keskabuki.  
Jakia jabu unainsmapabun jawen jatu uinmaidan,  
maiti atimapa sawea keskabuki.
- <sup>25</sup> Tsuanda jawada ikaibu ibubis uintanan,  
xanen ibu yui pewaxuna jawen jancha ikunwankin  
juni betsan jiwea piskumatidubuki.  
Jakia tsuanda uianmabia kaka besti  
ninkatan chanichakakin xanen ibu tenanmatidubuki.
- <sup>26</sup> Tsuanda Jehová ikunwankin duawai  
jawa dateama jiwekubainmisbuki.  
Jaska jawen ibu jiwea uinkubaini  
jawen bakebu jawa datetidubumadiki.
- <sup>27</sup> Jehová duawakin min benimawaidan,  
jabia min jiwea kayabiki,  
mawa kayabi min ma binushinawen ana dateamadan.
- <sup>28</sup> Xanen ibu kushipakin yuda ichapa yunukubainaya  
kenwankubainmisbuki.  
Jakia yuda eskadabes yunukubaini  
jatun xanen ibu babui ana kushipamaken

ana jawa ninkatidubumaki.

- <sup>29</sup> Tsuada jawa jin jin ikama unanxubida janchakin  
jawen unanepa jatu uinmakubainmisbuki.  
Jakia tsuada jin jin iki jawaida janchakin  
jawen patapa jatu uinmakubainmisbuki.
- <sup>30</sup> Tsuanda jawada bika teneai jenetan  
ana jawen nuiamaken jawen yudaki isin jikitidumaki.  
Jakia juni betsan mabu uin jabias jayadianun ika kemumisbudan,  
jatun yudaki isin xauki tekitan chapuai keskabuki.
- <sup>31</sup> Tsuanda nuitapaibu bika tenemakin ichakawakinan,  
jatun damiwani Dios danain jaki sinatamamisbuki.  
Jakia tsuada nuitapaibuwen nuikin  
jatun damiwani Dios duawakin benimawakubainmisbuki.
- <sup>32</sup> Juni chakabu jatun chakabuwen chakabuwai di imisbuki.  
Jakia juni pepabu duapakubaini  
jawen pepawen jawa dateama unanuma mawatidubuki.
- <sup>33</sup> Tsuabunda bebunkidi pe shinankubainmisbudan,  
jatun shinan medan unanepa jancha jayabuki.  
Jakia unainsmapabun unanepati jancha jawa tapintidubumaki.
- <sup>34</sup> Jatun yunuti kushipa pepawen  
nawa xukua betsa xanen ibui ibubis kenkubainmisbuki.  
Jakia xanen ibun chakabuwakin  
kanekubainaiwen jawenabu dakekubainmisbuki.
- <sup>35</sup> Dayadubu pepa anikabu xanen ibubun jatu bechipaikubainmisbuki.  
Jakia dayadubu mawaida anikabumadan,  
xanen ibubu jatuki sinatakubainmisbuki.

**15** <sup>1</sup>Jancha pewen jatu kemakin pewakinan,  
sinataibu jatu daewamisbuki.  
Jakia jancha kushipawen kunyan akin yuikinan,  
ana jatu sinatajaidamamisbuki.

<sup>2</sup> Juni unanepa janchakinan,  
jawen unanepa jancha kainmamisbuki.  
Jakia unainsmapabun jancha yuibiaidan,

jawa jancha pe yuisbumaki.

<sup>3</sup> Jehovánan, dasibi mae tibi anuabu jatu uin keyubaunikiki,  
jabu pepabu inun jabu chakabubudan.

<sup>4</sup> Jancha duapawen jatu unanuma jiwemakubainmisbuki.  
Jakia bepadameti janchawen jatun juinti nishma  
wakubainmisbuki,  
jatu punu nuka wakinan.

<sup>5</sup> Jatun epan jatu nemakin pewamis jancha  
ja unainsmapabun ninkaisbumaki, danankinan.  
Jakia unanepatun jatun epan jatu nemakin  
pewamis jawen jancha ninkakin  
xabakabi jatu uinmakubainmisbuki.

<sup>6</sup> Juni pepa ichakanikamatun jiwe anudan,  
mabu inun piti ichapa jayakunkainmiski.  
Jakia juni chakabubun mabu inun piti ichawabiai  
jawen jawada bibiakinan,  
jawa ibubis pe medabe bitidubumaki.

<sup>7</sup> Unanepabun jawen unanepa jancha yuikinan,  
jatun jancha pepa sa aka keska wakin  
pawabaunmisbuki.  
Jakia unainsmapabun shinain janchamisbudan,  
jawen janchawen tsua jatu medabewatidubumaki.

<sup>8</sup> Juni chakabubun inabu Dios kuaxunkin inankuiainbu  
Jehován jatu danankin uinkatsi ismaki.  
Jakia juni pepabun Diosbe janchakin dayuikin yukaibu benimakin  
Jehován jatu ninkamiski.

<sup>9</sup> Jaska juni chakabubun shinan pewama jiwekubainaibu  
Jehován jatu danankin bechipaismaki.  
Jakia juni pepabun pepa chibain jiwei pekubainaibu  
Jehován jatu bechipaimiski.

<sup>10</sup> Pe jiwei taebiakainkin jatun jiwea bai jenekin chakabuwaibu  
ana jatu pewakin chintunmaidan, bikajaidaki.  
Tsuada jatu yusinkin pewabiabu  
jatun jancha ninkama danainan, tenanxankanikiki.

- <sup>11</sup> Jehován dasibi jatu uinmiswen taea  
janu mawaibu inun janu mawa bumisbu unan keyuikiki.  
Jakia jaska jatu binuawen taexun  
Jehován junibun shinanmis binujaidaki.
- <sup>12</sup> Patapa ninkaisbuman jatun nemati jancha bechipaisbumaki,  
jatun shinan besti bechipaikinan.  
Ja dikabi unanepabu danain jatube dasikatsi isbumaki.
- <sup>13</sup> Jatun juinti benimaidan,  
jatun besu benimadai mapumisbuki.  
Jamen jatun juinti punu nukadan,  
kaxa tenea mapumisbuki.
- <sup>14</sup> Juni shinan unanepatunan,  
ana tapinjaidanun ixun shinan bena ninkakubainmisbuki.  
Jakia unainssmapabun jawa pepa unanma  
atimapa besti shinankin yui jiwemisbuki.
- <sup>15</sup> Tsuada bika betsaa betsapa tenei  
xaba tibi nuitkaunkaini jiwemisbuki.  
Jakia tsuada juinti benima jayadan,  
xaba tibi besi jawenduai keskai jiwemisbuki.
- <sup>16</sup> Mabu midima jayabia jawen datei jiwekubaintidubuki.  
Jakia tsuada mabu eskadabesiyabiatun  
Jehová duawakin jatu binujaidatidubuki.
- <sup>17</sup> Sinatai dakekenankin awa nami pepa jatumesti pikubainmisbuki.  
Jakia bechipainamekin yunu besti jaya pikinan,  
ja piti pepa pimisbu jatu binujaidabuki.
- <sup>18</sup> Jawaida sinatai janchakin jatu pubenmamisbuki.  
Jakia tsuabunda pe shinain jawaida sinatama  
jawen jancha pewen jatu nemamisbuki.
- <sup>19</sup> Chikishin jiweadan, jawen jiwea baidan,  
muxan kaian bexeaki.  
Juni pepabun jiweadan, bai jaxpa  
jawa tan akama xunpin anu mapua keskabuki.
- <sup>20</sup> Bake unanepabun jatun ibubu benimawamisbuki.

Jakia bake unainsmapabun jatun ibubu danankin  
jatu dake wamisbuki.

<sup>21</sup> Bebunkidi pe shinainsma patapabudan,  
patapa bestinun ika benimakubainmisbuki.

Jakia jabun jawaida tapinikabunan,  
ibubis jatun jiwea pewakubainmisbuki.

<sup>22</sup> Tsuanda jamapai anun ixun  
jamebi yubakai jawa yuka ikamadan,  
jawen yubaka pe kaintidumaki.

Jakia tsuanda jamapai anun ixun  
unanepabu ichapabu jatu medabe yuka  
jabun shinan pewen medabewamisbudan,  
jawen yubaka pe kainmamisbuki.

<sup>23</sup> Jawada bikatsi yuka itan pepawen min manai  
jawa bikama mia yuikin pewaxanai jaska peki.

Jakia jaska yuka ikin bikatsi shinain  
binumakin jawaida jaki nukumaidan, ja pejaidaki.

<sup>24</sup> Diosun bai nai anudan, janu unanepabu butidubuki,  
chakabu mawa janu jatu kupixanai anu buama piskuidan.

<sup>25</sup> Iubis kenmisbun jiwe Jehován di akin chakabuwabiakin  
ainbu beneyabiani ana bene jayamatun jiwe inun jawen miban  
shadabu  
Jehován mekexunkubainmiski.

<sup>26</sup> Juni chakabubu yubakaibu  
Jehován jawa bechipaiama jatu dananmiski.

Jakia jabun jancha chakabu yuisbuma  
jatun jancha pe bestiwen Jehová benimakunkainmiski.

<sup>27</sup> Tsuanda jawenas besti wanun, iwanan, mabuwen kemukin  
jawenabu duawama ibubis chakabumisbuki.

Jamen tsuanda jawen chakabuwen taexun  
xanen ibu june pei inanpaia danankubainmisdan,  
jiwei pekunkainkin  
Jehová benimawamiski.

<sup>28</sup> Pepabun ja dukun shinan pewatan

ja kachu jancha pepawen jatu kema pewamisbuki.  
 Jakia juni chakabubun jawa shinan pewama  
 jawaida jancha chakabu kainmamisbuki.

<sup>29</sup> Juni chakabubu Jehovábe janchakin yukabiabu  
 jawa jatu kemakin ninkaismaki.  
 Jakia juni pepabu Jehovábe janchakin yukaibu  
 jatun jancha jatu ninkakubainmiski.

<sup>30</sup> Tsuanda besu jawendua sinatama uin benimamisbuki.  
 Ja inun, tsuanda kakape bana ninkatan  
 shinan chankain jawen benimai jawen  
 kushipakubainmisbuki.

<sup>31</sup> Tsuanda chakabuwai unanepabun jatu nema  
 jatun jancha ninkai  
 unanepabu ibuwatan jatube tsauxankanikiki.

<sup>32</sup> Tsuanda chakabuwai nemabiabu  
 jatun nemati jancha ninkama jatumebi dananananmisbuki.  
 Jakia tsuanda jatun nemati jancha ninkakin tapinkubainidan,  
 bextekei unanepamisbuki.

<sup>33</sup> Jehován nemati jancha tsuada jawen datekinan,  
 jawen unanepakin tapinkubainmisbuki.  
 Chipu matu kenwanxanaibudan,  
 ja dukun ibubis keanma pe jiwekunkaintiki.

## 16<sup>1</sup> Junibu yubakabiakubainaibun januxun Jehován jaska bechipai amakin jatu taxnimaxunmiski, jaska bechipaiama bextekinan.

<sup>2</sup> Junibun shinankin ibubis bemakis aki:  
 “En pewaii”, iwanan, shinankubainmisbuki.  
 Jakia Jehován jatun shinan uke medan  
 padananainbu jatu unan keyumiski.

<sup>3</sup> Jamen jaska akatsi ikin bebunkidi jaki chiti ikin  
 Jehová min yuishina  
 min yubaka peken jawada pepa  
 Jehován mia amakubainxanikiki.

- <sup>4</sup> Jaska bechipaiai chibankin  
 Jehován dasibi dami betsapa wakin keyuniki,  
 juni chakabubun ninkaisbumadi janu jatu kupiaitian  
 jatu kupikubainti wakinan.
- <sup>5</sup> Ibibis kenkubainmisbu  
 Jehován bechipaiama jatu kupikinan,  
 betsabu jawaida kupikin inun  
 betsabu manakubainkin jatu kupimiski,  
 jatun chakabu binumamadan.
- <sup>6</sup> Jamapai chakabu tibi yuda betsabuna jakimaidan,  
 Jehován nuikipawen chanima atiki.  
 Jehová duawakinan,  
 chakabu tibi min jeneakeakekubainaii.
- <sup>7</sup> Tsuada jiwei pekunkainkin Jehová benimawaibun  
 januxun jatuki sinataibu Jehován jatu daewaxuntiduki,  
 jau ana jabe sinatama ja dabe jau jiwei pekubainunbunan.
- <sup>8</sup> Juni pepama padananankubainkin  
 pei ichapa bikubaintidubuki.  
 Jakia juni betsja jawa padanananma  
 pe dayakunkainkin eskadabes bibiakin  
 ja juni padanananmisbu jatu binujaidaki.
- <sup>9</sup> Jawada wakatsi junibu yubakakin shinainbu  
 Jehován jatu medabewakin  
 jaska wai buaibu jatu yunukubainmiski.
- <sup>10</sup> Xanen ibujaidatun yunukinan,  
 ibubis xanen ibuama Dios janchaxunkin  
 jatu unanti wakin jatu kupikin  
 jau kaneyamanunbunwen.
- <sup>11</sup> Jau jatu padanyamaxanunbun  
 jawen xankama unanti inun jawen chaipa tanati tibi  
 Jehován jawen jatu unanti wakatsi jatu dami wamaniki.  
 Jamapai tanati pepa jatu yunubiani  
 jawen yumetsukin jatu benukubainmisbu jatu kupixanikiki.
- <sup>12</sup> Xanen ibujaida chakabutun yunuchakaibu

Diosun jatu dananjaidamiski.

Jakia xanen ibujaida pepatun jawen yunuti kushipawen  
jatu pe yunumisdan, jabudan, pepaki.

<sup>13</sup> Jancha chanima yuiaibu  
xanen ibujaidatun jatu bechipai  
jatuwen benimakunkainmiski.

<sup>14</sup> Jabun xanen ibujaida sinatamakin yunukin beduabudan,  
ma jabianu xanen ibun jatu tenanmatiduki.  
Jakia unanepabun xanen ibujaida sinatai daewatidubuki.

<sup>15</sup> Xanen ibujaida benimaya pe jiwekubaintidubuki.  
Xanen ibun jawen shinan pepawen jatu pe mekeadan,  
ui bekin mai metu cha amis keskaki.

<sup>16</sup> Mane oro kadujaidabiaken  
shinan unanepatun binuaki.  
Mane plata kadujaidabiaken  
tapinikatun binudiaki.

<sup>17</sup> Juni pepabu jiwei pekainkinan,  
chakabu tibi ana akama jenekubainmiski.  
Jaskakin jatun jiwea mekekin  
jatun yuda ibubis pe mekediakubainmisbuki.

<sup>18</sup> Ja dukun kanei ibubis kenkunkainaiwen taeadan,  
chipu chakabu dasibi jukin bexte keyuxanikiki.

<sup>19</sup> Keinsbuma nuitapaibube jaibunamekin  
mabuyabu man jatu binujaidatidubuki.  
Jakia juni mabuyabudan,  
kenikabube jaibunamemisbuki.

<sup>20</sup> Yununika pepatun jamapai akin pewaidan,  
jawen daya pewakubainkin ewa wamiski.  
Tsuanda Jehová ikunwanyan  
benimawakin jatu duawamiski.

<sup>21</sup> Tsuada unanepakunkainai jakidi shinankinan:  
“Jadan, jawaida tapinikaki”,  
akin yuikubainmisbuki.

- Tsuada jancha duapatun  
juni betsa yusinkin jatu shinan betsa wamatidubuki.
- <sup>22</sup> Tsuabuda unanepa shinan pepa jayadan,  
jatun jiwea pedan, chacha jabai keskaki.  
Jamen unainsmapabu tsuanda man jatu yusinkubainaidan,  
man jatube jabiaskadiki, unainsmapadan.
- <sup>23</sup> Tsuada unanepa jancha jayatun shinankubainkin  
jawada xabakabi jancha jatu yui pewakin binumaya:  
“¡Chanimaki!” ikin yuikubaintidubuki.
- <sup>24</sup> Jancha pepa ninkai ana punu nukama kushipai  
benimakubainmisbuki,  
buna bata aka keskaidan.
- <sup>25</sup> Jaska jatun jiwea bai pe dabanen chibankubainaibudan,  
jabun jiwea jawen jeneaitianan,  
jatu kupia mawa bestixankanikiki.
- <sup>26</sup> Buniamma pikubainun ika dayakubainmisbuki,  
buniwen taea datei jawa chikishamadan.
- <sup>27</sup> Juni chakabubun janchadan,  
chi jede ji ikai keskakin jawen janchawen  
chakabu tibi taxnimamisbuki.
- <sup>28</sup> Juni atimapá jawen jancha chakabuwen ja imisbuki.  
Chani yui yuananankin jatu sinatamamisbuki,  
jawan jaibube jatu sinatanamemakinan.
- <sup>29</sup> Jawaida detenamekatsi imistun  
jawan jaibu ja dapi jiweabu padankin  
jaska jawen jaibun shinanmabiaken jatu yunu chakakubainmiski.
- <sup>30</sup> Tsuanda jawen jaibu beduwen kasmai kexawen yunukin  
chakabuwamakatsis ikin yunumiski.  
Tsuanda ma chakabuwa unankinan,  
jawan kexa mukua dakaxun jatu unanmamisbuki.
- <sup>31</sup> Tsuada jiwei pekaini chakabuismadan,  
anibui jawen bu siun siunpaya

maiti jawendua sawea keskaken  
kenwanxankanikiki.

<sup>32</sup> Jin jin ikama jamapai tenetan manamistunan,  
mentsisipabu jatu binujaidaki.  
Jawada chakabu binukin  
tsuanda matun yuda man mekemisdan,  
jabun maewan achikin jatu maemamisbu  
man jatu binuaki.

<sup>33</sup> Junibun jamapai bikatsi  
jawen jamapai unanti xau mexte númeroya udeanbu  
jadatukida número kaiain  
Jehován katukin jatu unanmamiski.

**17** <sup>1</sup>Besikin piti ichawaxun pibiai  
sinatai detenameyabi betsabu jiwemisbuki.  
Jamen misi natianma bawaima  
kushi besti pibiai unanuma jiwekin  
jatu binumisbuki.

<sup>2</sup> Tsuanda juni bake tatimawen taexun  
jawen tsuma unanepa ikunkainkin xanen ibukin  
ja bake tatima yunukubainxanikiki.  
Janua jawen ibu ma mawaken jawen juni bake betsabubetan  
ja jawen tsumapan jawen mabu paxkaxanikiki.

<sup>3</sup> Oro mane inun plata mane jas unanun, iwanan,  
chiwen kuakin unanmisbuki.  
Jaska keska wakin junibun shinan pepa inun chakabu  
Jehován unanti wakubainmiski.

<sup>4</sup> Juni chakabu chanichakamistun chakabu tibi yuiaibu  
chakabu yuimisbundi jatun jancha ninkakin bechipaikin  
pawamisbuki.

<sup>5</sup> Jawa jayama nuitapaibuki kaxekin  
Diosun jatun jatu dami wani sinatamamisbuki.  
Tsuada nuitapabiai chakabuwai benimakubainmisbudan,  
jawen jatun kupixanai jaska waxun binutidubumaki.

<sup>6</sup> Anibubun maiti jawendua keskadan,

- jawen bababu jayakubainmisbuki.  
 Jatun epabu pepabuwens taea  
 jatun bakebu kenkubainmisbuki.
- <sup>7</sup> Unainsmaputun jawa jancha pepa  
 yuitidumajaidaki.  
 Jakia juni tsuada jaki kaxemisbuki  
 juni pepa betsa jakidi janchakin  
 jatu padantidubumajaidaki.
- <sup>8</sup> Jawadawen jatu duawakin taewabainkin  
 pei kasmai mabu june jatu inankubainkin:  
 “En jatu jaska wa  
 ea medabewatidubuki”, iwanan,  
 shinankubainaiwen taexun  
 jawada jawen chakabu axuntidubuki,  
 yushin chakabun kushipa jaya ikunwain keskawenan.
- <sup>9</sup> Jawen jaibun kanebiashinken  
 jakidi yuibaunama junexunkin  
 jawen jaibu bechipaimamiski.  
 Jakia jawen jaibun kaneshina  
 junexunama chanikaunkin  
 jawen jaibu dananmakin putamamiski.
- <sup>10</sup> Junin jawaida tapinmis pewakin:  
 “Min ma kaneaki”, akin xanen ibun yuia  
 ibubis jawaida shinankin pewamiski.  
 Jakia unainsmapa pewanun, iwanan,  
 100ki kusha kusha abiabu  
 jawa tapintidumaki.
- <sup>11</sup> Xanen ibu kaya kushanun ixun  
 juni chakabubun jawada chakabuwai benamisbuki.  
 Jakia jabun chakabuwaibu jau jatu kupitanun  
 tsuada mentsisipajaida Diosun yunuxanikiki.
- <sup>12</sup> Jawen bake bianbainabuwen taea  
 yuinaka oso yuxan pubein sinataiki nukua meseki.  
 Jakia unainsmapa sinatakin atimapawai  
 patapakunkainaiki nukuadan,  
 ja oso yuxan binuaki.

<sup>13</sup> Tsuanda juni betsa medabewabiamis  
jantsidi manakukin medabewaismadan,  
jaskawen taea jawenabu nuitapai jiwekubainxankanikiki,  
jawen shinan chakabuwen taeandan.

<sup>14</sup> Jene bai mata chakayamakin  
juni betsan bai achi keyumisdan, chakabuki.  
Jaska keskanun ika tsuada ja iki taeaibudan, chakabuki.  
Jau pikuyamanun ja iki taeaibu anua  
jawa yuiama jatu jenebainadan, jaska pejaidaki.

<sup>15</sup> Tsuabunda chakabuwa xanen ibubun jawa jatu kupiama meketan  
jakia tsuabunda jawa chakabuwamabiaken  
xanen ibubun jatu kupiaibu  
Jehová sinatakin jatu bechipaismajaidaki.

<sup>16</sup> Peiwen unanepa jancha binun ika ja unanepa tapintidumabia  
¿jaskai unainsmapa peiya juimenkain?

<sup>17</sup> Jawen jaibu kayabitun jawa jeneama bechipaimisbuki.  
Jawen betsa kayabi keska wakin  
janu bika teneaitian medabewakubainmisbuki.

<sup>18</sup> Jawen jaibun juni betsa anua pei biyukatsi ikaya  
bebunkidi pe shinamma  
juni betsabe yubakaxun min inanmakin  
min jaska wamaimadan, jaska pemaki.  
Jau jaskayamakubainunbunwen.

<sup>19</sup> Tsuada ichakanikakatsis ikin bechipaimisdan,  
detenameadi bechipaimiski.  
“Ean besti ibubis en unanjaidaii”,  
ikin shinankubainmisdan,  
ibubis jawen kushipa benuxanikiki.

<sup>20</sup> Jawen shinan pemabia  
padananain jancha chakakunkainmisdan,  
jawa pepa jaki nuku taskama ikunkainxanikiki.  
Chanichaka besti padananain janchakubainmisbu  
dakei bika tenekubainxankanikiki.

<sup>21</sup> Juni betsan bake waima

jawen bake betsa unainsmapatunan,  
 jawen epa nuimakin bika tenemaxanikiki.  
 Ja bake tatimatut jawen epa jawa benimawamatidumaki.

<sup>22</sup> Tsuada juinti benimai pepeidan,  
 dau pepa xea keskaki.  
 Jakia tsuada juinti nishmakin jawen benima jeneidan,  
 jawen yuda babui keyumiski.

<sup>23</sup> Jawada pepa betsa wakin chakabuwanun, ixun,  
 juni chakabubun xanen ibu kushipabu  
 june jatu pei inankubainmisbuki.

<sup>24</sup> Jawaida tapinikatunan,  
 jawen unanepaben jaska shinankin akatsis imiski.  
 Jakia unainsmapatun jawa pe shinanma  
 jaska akatsis ikai mawaida jakidi shinan pewaisbumaki.

<sup>25</sup> Bake unainsmapatun jawen epa sinatamakin  
 jawen ewa juinti nishma wakin dananmamiski.

<sup>26</sup> Tsuanda jawa chakabuwamabiaken  
 jatu kupimakin pakamadan, chakabuki.  
 Ja inun, juni pepabiaken  
 jatu kusha kusha amaibudan,  
 jaska pemajaidaki.

<sup>27</sup> Unanepabudan, jaskaida jancha yui  
 jancha chakayamaisbumaki.  
 Ja inun, jawaida tapinmisbunan,  
 jawada uinkin ninkabiatan  
 pesxun uin bestimisbuki.

<sup>28</sup> Unainsmapabia jancha unanjaidai keska inun tapinjaidanika  
 keskakin  
 jawada tibi uinbiatan jawa yuialma  
 pesxun tenemisdan,  
 unanepa keskakin jatu uinmamisbuki.

**18** <sup>1</sup>Tsuanda ibubis jaska bechipaikin  
 akatsis ikai jawenas besti shinain  
 juni betsan yusinti jancha bechipalama

bextekin danankubainmisbuki.

<sup>2</sup> Juni unainsmapatun shinanan,  
ana jawada betsa tapinkatsi ismaki.  
Jaska jawen shinan ma jaya unankin  
jaska besti jatu yuikatsis imisbuki.

<sup>3</sup> Jamapai chakabuwaidan,  
ja besti kaka taxniam  
dake paeyabi kainmiski.  
Kenmisbu beaibun jatuki dakei  
jatuki jancha chakabumisbuki.

<sup>4</sup> Juni unanepatun janchadan,  
jene nuajaida keskaki.  
Janua jene bei tueai keskai  
jawen unanepa jancha ichapa mata jayaki.

<sup>5</sup> Juni chakabubiaken pepabu keska wakin  
xanen ibu unanikabun jatu mekekin  
ja jabun jawa chakabuwaibuma jatu ichakawakin  
jatu padanmisbu jaska pemajaidaki.

<sup>6</sup> Ja unainsmapa jiwe betsa anu kaxun  
chakabu jatu tuexunmisbuki,  
jau jawen taea ja iki detenamenunbunan.  
Jatu jaskamamiswen taexun  
ja juni kusha kusha atidubu peki.

<sup>7</sup> Unainsmapa jawen kexawen janchaidan,  
ibubis chakabui dispiwen tenexekea keskamisbuki,  
jawen jiwea chakabuwaidan.

<sup>8</sup> Machupan chani yuibaunkinan,  
misi batapabu pimisbu keska wakin  
jatu ninkamabaunmisbuki,  
jatun shinan uke medan jatu mistukin chakabuwakinan.

<sup>9</sup> Chikish inun jamapai shadabu chakabuwanikadan,  
ja dabe jawen betsa kayabi keskaki.

<sup>10</sup> Jehován kushipa kayabi shinantidan,

mishki kushipa jiwe keyatapa wanibu janu iduti keskaki.  
 Tsuada pepabu jatun mekenika Jehová anu ichai buaibu  
 jatun mekekubainmiski.

- <sup>11</sup> Juni mabuyatun jawen mabu ichapakidi shinankin ikunwainan,  
 mishki kushipawen mae kenebaunkin keyatapa wanibu  
 jatun mekea keska  
 tsua jikikain metiduma keska shinamisbuki.
- <sup>12</sup> Ja dukun kanei ibubis kenkunkainaiwen taeadan,  
 chipu ana jawa jayama keyuxanikiki.  
 Jakia ibubis keinsmadan,  
 chipu jawen jamapai jawenduawai xabakabixanikiki.
- <sup>13</sup> Jatu jancha wakin jawen jancha jatu yui keyudiamabiaken  
 bebunkidi unainsmapatun jawaida jatu kemakin  
 jatu dakewamisbuki.
- <sup>14</sup> Isin tenebiai jawen uinti shinan chankantiduki.  
 Jakia punu nukai keyua dakaken  
 tsuan shinan chankanwankin benimawatidumaki.
- <sup>15</sup> Unanepa tapinikabunan,  
 unanepa jancha shadabu benakin  
 ana tapinkubainmisbuki.
- <sup>16</sup> Xanen ibujaida betsabe janchanun ixun  
 tsuanda jawen daewati pepa bexun  
 jawen tsuma min inan mia bichitiduki.
- <sup>17</sup> Ja dukun tsuada padananain janchai taeai ninkakin:  
 “Jawen jancha chanimaki”, ibiatan  
 jakia ja kachu betsadi chanikin yui pewai ninkatan  
 jatun shinan betsawatidubuki.
- <sup>18</sup> Xuku dabetun shinan dabe wai ja ikaibu  
 jadatuda pe jatu unanun, iwanan,  
 jawen jenekin tapinkatsi  
 juni betsan unanti númeroya udenkin  
 Jehován jaska bechipaiai jatu yunuai tapintidubuki.
- <sup>19</sup> Mishki kushipawen mae kenebaunibu

jawa bika teneama tsuanda di atidu bikajaidaki.  
 Jamen jawen betsa sinatamajaidashina  
 jawa bika teneama keska daewakin  
 shinan betsa wamadan,  
 ja binua bikajaidaki.  
 Xanen ibun jiwe anu jawen nemakin  
 mane kushipawen kebenibu anu  
 tsua jikitidubuma keskai  
 tsuada ja idabetan paxkakainadan,  
 ibubis chakabuima ana daeama jabe sinatapaketiduki.

<sup>20</sup> Pikin yaniwai keskai  
 tsuada jatun jancha tibiwen ibubis janchakin ninkai benimamisbuki.

<sup>21</sup> Min janchawenan,  
 min jiwxanai inun min mawaxanai  
 jadatuda yui min jancha.  
 Jaska chakabu yui min jancha chakayamamisdan,  
 jabiaskadi mei min bika tenepakexanaii.

<sup>22</sup> Tsuanda ainbu pepa biadan,  
 jawen taea pepa besti jayakunkainxanikiki.  
 Jehován jawen mia duawakatsi  
 jawen pepa mia uinmakubainikiki.

<sup>23</sup> Nuitapaibu jancha pewen ea ibiaibun  
 jakia juni mabuyabun jatun jancha kushipawen  
 jatu kunyan akin kemamisbuki.

<sup>24</sup> Juni jaibu ichapa jayabia  
 jabun jawaida ichakawatan jenebaintidubuki.  
 Jakia jawen jaibu jatidibun  
 jawen betsa kayabi binumakin duajaidawatidubuki.

**19** <sup>1</sup>Unainsmapa inun chani besti yuibauni mapumisbudan,  
 ja nuitapaibu inun ja juni pepabu  
 jatukidi pe yuimisbun jabun jatu binuaki.

<sup>2</sup> Jawa bebunkidi shinan pewama jamen benimakain  
 daya chakayamabiashina jaskadan,  
 jawen daya pe kaintidumaki.  
 Jawada tibi jawaida jin jin ikin akinan,

benukin kanejaidatidubuki.

- <sup>3</sup> Juni betsa patapakin jawen jiwea ibubis chakabuwa januxun: “Jehován ea kanemashinaki”, iki unainsmapabu jaki padanamisbuki.
- <sup>4</sup> Juni mabu ichapayadan,  
midimabun jaibuwai bemisbuki.  
Jakia juni nuitkaaitunan,  
jatun jaibuaibu benu keyumisbuki.
- <sup>5</sup> Jawada uianma inun uinbiatan chanichakamisbudan,  
jabunan, jatun kupiti chakabu binuama bixankanikiki.  
Chani chakamisbu jatun chakabuwen taexun  
jawa unanuma wakin  
jatu mepanmakin pewama ixanikiki.
- <sup>6</sup> Tsuada shinanyan inun mabu jatu inanmisbudan,  
dasibibun bechipaikin jaibuwamisbuki.
- <sup>7</sup> Tsuada jawa jayamawen taexun jawen betsabun danaibun  
chanima jaskawen taexun jawen jaibuaibundi jenebainmisbuki.
- <sup>8</sup> Tsuanda jawada tapintan ja tapinmawen aki  
jiwekainkin ibubis pe shinanbainkin  
unanuma jiwekin  
jawen jamapai ewawabainxanikiki.
- <sup>9</sup> Jawada uianma inun uinbiatan chanichakamisbudan,  
jabunan, jatun kupiti chakabu binuama bixankanikiki.  
Chanichakamisbunan, jatun mawa besti manamisbuki.
- <sup>10</sup> Unainsmapa jawada pepa jayabia  
jawaida putakin keyubauni jawa jawenduatan jiwtidubumaki.  
Jaska dayadu esclavobu bexmasjaidabiatun  
xanen ibukin xanen ibujaidatun enabu jatu yunui  
jikitidubumajaidaki.
- <sup>11</sup> Bebunkidi shinan pewakubainmistun sinatai taebiatan  
jawaida ibubis daemisbuki.  
Jakidi janchai pemisbuwen taea  
jaki ja ibiabu ana shinanma ibubis jatu jakimawai pe bestikunkainmiski.

- <sup>12</sup> Inu betsa león pubein tekeden imis keskai  
 xanen ibu sinatakin jawen jancha kushipa jatu ninkamamiski.  
 Jakia xanen ibun jawenabu jatu medabewakinan,  
 jatu benimawamiski,  
 basi anu ui eskadabes ikin cha amis keska jatu wakinan.
- <sup>13</sup> Tsuanda juni bake jawa unanma unainsmapatun  
 jawen epa bika tenemakubainmisbuki.
- Ainbun jawen bene ja a chakayamakin jiwe chakamamisdan,  
 jiwe xui anu ui tuis tuis ikunkainmis keskaki.
- <sup>14</sup> Jiwe pepa inun mabu shadabu  
 jatun ibubu anua bimisbuki.  
 Jakia ainbu unanepa Jehován besti  
 jatuki nukumakubainmiski.
- <sup>15</sup> Tsuada chikish uxa besti shinain uxa bestikunkainmisdan,  
 dayamawen taea buni tenekubainxanikiki.
- <sup>16</sup> Tsuanda Jehován yunuti jancha inun  
 nemati jancha ninkatan chibankin  
 jatun jiwea mekemisbuki.  
 Jakia tsuanda Jehován yusinti jancha danain  
 jawen kupiti bika tenekubaini mawaxanikiki.
- <sup>17</sup> Nuitapaibu medabewakin jau jawen dayanun  
 man jatu pei inanyumisdan,  
 Jehová man inanya keskaki.  
 Nuitapai pewaima keska wakin  
 Jehován manakukin ana inanxanikiki.
- <sup>18</sup> Ewadiama jawadakidi min baken mia ninkatidu  
 yusinkin pewakubainwen.  
 Ja dukun yusinkin pewawe.  
 Jakia ana min pewatidumabia  
 kupikin ja chakabuwaiwen  
 tenantikidi shinantimaki.
- <sup>19</sup> Tsuada sinatajaidakunkainkin jawen kupiti bixanikiki.  
 Jamen jaskama jau kupiyamanunbun  
 tsuada jawen nuikin min jatu nemaxunbia

- ana sinata pikujaidaxanikiki.
- <sup>20</sup> Mia yusianbu ninkakin nemati jancha tapinkubaini  
juni ewai min unanepaxanaii.
- <sup>21</sup> Juni yubakai ibubis jawen shinanen janchakin  
akatsis ibiai atidumaki.  
Jakia jawen shinan nemakin  
Jehován jaska shinain jawena taxnimaxuntiduki.
- <sup>22</sup> Juni betsa yubakatan chanima amisdan,  
ja dasibun bechipaimisbuki.  
Ja inun, nuitapaibu janchamisbunan,  
ja chanichakai janchamisbu jatu binumisbuki.
- <sup>23</sup> Jehováwen datekin jawen jancha ninkakubainkin  
tsuanda jawen jiwea bai chiban pewai unanuma  
jiwekubainxankanikiki,  
jawada chakabu ibiaya jawa dateamadan.
- <sup>24</sup> Chikish bestidan, kenchakia besti piti mexunkain metan  
jakia jawen jaxpa anu jawa sananbidan mukutidumaki.
- <sup>25</sup> Enjen iki yuda betsabuki kaxemisbu jatu kupiaibun  
ja bebunkidi pe shinainsmatun uinkin  
jatuwen jawenakidi tapinkubaintidubuki.  
Jakia nemakanan bestiaibu ninkakin  
unanepabun tapinmisbuki.
- <sup>26</sup> Jawen epa ichakawakin  
jawen jawada yumetsuntan  
januxun jawen ewa jawen jiwe anua nichintan  
ja juni bake ichakanika jawen atimapawen dakeama jiwea uinmisbuki.
- <sup>27</sup> Min en bakewen taea epaan,  
mia nemaibu min jatu ana tapinkatsi ikama  
jatun yusian pepa jenetan  
min chakabukunkainxanaii.
- <sup>28</sup> Juni chakabubun jawada uianma  
inun uinbiai chani besti unankin  
jabun pewen jatu unanti wabiaibun

ja yunuti kushipaki kaxemisbuki.  
 Ja inun, juni chakabubun jatun kexawen  
 jancha chakabu yuikin jatu mesewamisbuki,  
 jashi kenujaida jatuki puta keska wakinan.

<sup>29</sup> Juni chakabu jatun yusian ninkama  
 jatuki kaxemiswen taea  
 jawen kushati ji ma jaki tana jayamisbuki.  
 Juni tatimadan, kushakin  
 pekushchakayamat peki.

**20** <sup>1</sup>Vino ichapa atan jawen taea  
 patapai juni betsabuki kaxemisbuki.  
 Shia paepa atandi detenamei  
 itimaskai chakabumisbuki.  
 Ja dabe aki tsuanda jatun shinan benutan  
 ana unanepatidubumaki.

<sup>2</sup> Janu xanen ibujaida sinatai pubenjaidaitianan,  
 inu betsá león pubein tekeden tekeden imis keskamisbuki.  
 Tsuanda sinatamaibudan,  
 jabu tenantidu jatun jiweidan, mesejaidaki.

<sup>3</sup> Ja ikeakeaibu ninkabiai  
 jatube kemanameisbumadan,  
 juni pepabuki.  
 Jakia juni unainsmapatunan,  
 chakabu teneabu jatun jatu tuekin taewaxunmiski.

<sup>4</sup> Janu mibainbutian chikishin jawa bai wama ibiaima  
 janu jatun xekiwan tsekaibutian  
 jawena binun ika kaxun  
 jawa bechiama ixanikiki.

<sup>5</sup> Junibun shinan juneadan, jene nuajaida keskaki.  
 Jakia jawaida tapinikabun unanti wakin  
 jabun shinan junea xabakabi unantidubuki.

<sup>6</sup> “Jatube yubakatan  
 betsá wama en menemiski”, iki  
 ichapabu janchabiamisbuken  
 chanima tsuan jaskatan menetidubumaki.

Jaskawen taexun junin jawada akin menemis benakin  
tsuan jania bechitidubumaki.

<sup>7</sup> Juni chanichakai padananainsma  
pe chibain jiwekunkainmis  
jawen bakebun jawen jiwea mawabaini benimakubainxankanikiki.

<sup>8</sup> Jatu unanti wanun ika  
jawen tsauti anu xanen ibujaida tsauxun  
chakabu unantan bextenun, iwanan,  
jatu beis keyubaunmiski.

<sup>9</sup> Tsuanda eska yuitidumajaidaki:  
“En shinan pepaswen taea  
en juinti medan en jawa chakabu jayamaki”, ikin yuikinan.

<sup>10</sup> Xankama unanti chakabu inun tanati pema  
ja dabe Jehován bechipaima  
tsuada jawen dayaibu jatu dananmiski.

<sup>11</sup> Bedunan jawen akawen  
jaska jiwekunkainai uinkin  
pepa kasmai chakabu unantidubuki.

<sup>12</sup> Jawen ninkati pabinki inun jawen uinti bedu  
Jehován dami wakin jatu jayawaniki.

<sup>13</sup> Tsuada man nuitkaakatsi ikamadan,  
uxa bestiyamakanwen.  
Jaskaidan, uxama man daya jeneama  
piti ichapa texe man jayakunkainxanaii.

<sup>14</sup> Juni betsan mabu bikin  
jawen kadu maikidi xekamanun, iwanan,  
yuikin: “Min mabu pema duakabiki”, tsuada ikaiwen taexun  
jawen kadu maikidi xekaxuna  
biantan benimabainmisbuki.

<sup>15</sup> Oro mane dauti shadabu midima  
mai jidabi anu jayabiabun  
ja juni unanepatunan,  
jawen jancha pepawen janchakin

ja oro mabu kadujaida binuabuki.

<sup>16</sup> Juni betsa min unanmatun  
 min pei biyukatsis ikaya min inanmaken  
 min jaibun mia inanmaya  
 januxun mian jawen tadi bianyutan  
 min mekexunyutiduki,  
 chipu mia pakaya min inantidudan.

<sup>17</sup> Jawen jatu bepadantan jatun piti pinun, iwanan,  
 yudabun chani buxun jatu yuimisbuki.  
 Jaskaidan, jatun chani janchawen taeadan,  
 mashì mukua keskamisbuki.

<sup>18</sup> Jatube detenamekin jau jatu binuxanun, iwanan,  
 jatun unanepabun jatu medabewakin jatu yusianbu ninkatan  
 jabu detenamenika xanen ibubu  
 ana pe yubakatidubuki.

<sup>19</sup> Machupa yuanantun ikaibu jawaida kaka pawabaunmisbuki,  
 jawa jatu junexunamadan.  
 Jaskabubedan, jatube ibunananyamakubainkanwen.

<sup>20</sup> Jawen ibu juni kasmai jawen ibu ainbu  
 jawen baken jatu yupukubaini mawaidan,  
 meshu ten ikai mesejaida anu buxankanikiki,  
 jatun jiwea benuidan.

<sup>21</sup> Jawa wamabia jawaida mabu bechipaikin bitan  
 chipu jatsantan ana jawen benimatidumaki.

<sup>22</sup> Tsuabunda mia ma chakabuwaken  
 “Ean en jatu kupiai”, iwanan,  
 shinain tsua janchatimajaidaki.  
 Jehová ikunwankin min manakubainaya  
 Jehován mia jatu kupixunkin  
 binumaxanikiki, mia mekekinan.

<sup>23</sup> Jawen xankama unanti pemawen tanakin  
 jatu padainbu ja xankama unanti chakabu jawen dayaibu  
 Jehován jatu bechipalama dananjaidamiski.

<sup>24</sup> Jaska yudabu mapukubainxanaibu  
 Jehován jatun bai jatu katuxunmiswen taexun  
 jaska jiwekubainxanaibu  
 ibubis tsuan bebunkidi unanmajaidaki.

<sup>25</sup> Jawada inankatsi Jehová yubai jaki tanabiatan  
 jas mestenwanma chipu shinan betsawadan, mesejaidaki.

<sup>26</sup> Xanen ibu unanepatun  
 juni chakabubu ana jatu uinkatsi ikama  
 jatu katutan jawaida jamapai tadanti xankamawen jatu  
 chushamamiski.

<sup>27</sup> Jehován jawen Yushin kushipa junibu inanitun  
 ja Yushinen junibun jiwea uke medanjaida  
 jatu unanti wakin bin chaxa keskawen unan keyumiski.

<sup>28</sup> Xanen ibujaidatun jawen xanen ibu mestenwain  
 jiwei pekin jawenabuwen nuikin  
 jatu pe mekekubainmiswen taexun  
 tsuan jawen kushipa mebintidumaki.

<sup>29</sup> Jatun yuda kushipawen taea  
 bedunanbu kenkubainmisbuki.  
 Jakia ana kushipamabia anibukunkaini  
 jatun bu siun siunpawen taexun  
 jatu kenwankubainmisbuki.

<sup>30</sup> Kusha kusha akin jatu isin tenemakin  
 juni chakabubu jatu pewatidubuki,  
 shinan chakamisbu jatu pewakinan.

**21** <sup>1</sup>Jaska xanen ibujaidatun shinankin atidudan,  
 Jehován kushipawen jaska bechipaiai amamiski,  
 jawen shinan jene bai tapia keska waxunkinan.

<sup>2</sup> Junibun jawada watan shinankin;  
 “Dasibi en pe waxuki”, iwanan, yuibiakubainaibun  
 jakia jatun shinan uke medan  
 Jehován uinkin jatu unanti wamiski.

<sup>3</sup> Jiwei pekainkin Diosun yunuti kushipa inun

dasibi jaska bechipaiai tibi  
 tsuanda jawen yunua axuainan,  
 daewakin inabu kuaxunmisbu binujaidamiski.

<sup>4</sup> Jati chakabujaida Jehován dananmiski:  
 ibubis kenmisbu inun,  
 jaska dasibi jawen shinanen unan keyuaikidi chanibaunaibu inun,  
 kanekin chakabu tibi akubaini jiwemisbudan.

<sup>5</sup> Jawada akatsi bebunkidi shinan pewakubainkin  
 yubakatan akaibudan, pekainkunkainmiski.  
 Jakia jawada akatsi bebunkidi shinan pewadiama  
 yubakatan anikapai nuitapakubainmisbuki.

<sup>6</sup> Padananain chanichakabetanan  
 mabu inun pei ichapa ichawakubaini jawen jiwemisbudan,  
 kuin puabaini jawaida yamabainmis keskai  
 jatun mawa benamisbuki.

<sup>7</sup> Jawada yunuti kushipa pepa  
 chibain jiwei pekatsi ikamawen taexun  
 juni chakabu mentsisipakin jatun kushipawen  
 jamapai chakabu betsa betsapa atimapa wai  
 ibubis yamai keyuxankanikiki.

<sup>8</sup> Jaska juni chakabubun shinain jiwemisbudan,  
 jawa mestenma jawen bai kayatapiamaki.  
 Jamen jaska juni pepabu jiwekin  
 jatu uinmamisbudan,  
 jawa chakabu jakidi janchaisbuma  
 pepabu bestiki.

<sup>9</sup> Jiwe ewapa jawendua anu jiwxun  
 ainbun jawen bene ja a chakayamakin  
 jiwe chakamamisdan,  
 jaska jiwea pemaki.  
 Jamen ja binumai juni betsan jiwe manaundi  
 tsuada dexun betsa ewapama anu  
 ja mesti jaskanu jiwea peki.

<sup>10</sup> Tsuanda jatu chakabuwanun, iwanan,  
 juni chakabubun shinankubainmisbuki,

ja dikabi ja dapi jiweabu jatu uinbiakin  
ana jatu duawatikidi shinan pewamadan.

- <sup>11</sup> Enjen iki yuda betsabuki kaxemisbu jatu kupiaibun  
jabun bebunkidi pe shinaainsmatun uinkin  
jatuwen jawenakidi tapinkubaintidubuki.  
Jakia tsuada yusinanain  
unanepabun ninka bestitan tapinmisbuki.
- <sup>12</sup> Dios pepatun juni chakabubu inun jawenabu jatu uinkubainmiski.  
Januxun ja juni chakabubu jatu kupikinan,  
jatu nuitapawamiski,  
ana jawa pepa jayama jatu wakinan.
- <sup>13</sup> Tsuada nuitapakin jatu ea abiabu  
jawa medabewakin jatu uinmaismadan,  
chipu jabiaskadai medabe yuka iki ea idiaya  
ja manakukin tsuan jadi jawa inanma ixanikiki.
- <sup>14</sup> Tsuada sinata chakayamabiaya  
ja jaki sinataitun june jawada inankuinkin  
ja sinatajaidai daewatiduki.
- <sup>15</sup> Xanen ibubun yunuti kushipa pepawen yunukubainaibun  
juni pepabu benimamisbuki.  
Jakia xanen ibubun jancha ninkama junibu atimapakubainkin  
jatun mabu benukin keyumisbuki.
- <sup>16</sup> Bebunkidi shinan pewai jiwebiakunkainima  
jaska jenetan ana chibanmadan,  
janu mawabu bumisbu anu jadi kaxanikiki.
- <sup>17</sup> Benimaiwen kemu bestinun ixun  
vino jawen paenti inun, xeni ininipa inun,  
besiti tibi bechipaikin kemukin beya waidan,  
jawauma nuitapai keyuxankanikiki.
- <sup>18</sup> Juni pepa padananainsbuman jatun xantukun  
juni chakabu chanichakamisbu yumankubainxankanikiki.
- <sup>19</sup> Jawen ain jawaida sinatai  
ja ichakayamakunkainmisbe jabe jiweadan, bikaki.

Jaska binuidan, jadi tsua jiweabuma anu  
ana bikama jiwekunkaini jaska peki.

- <sup>20</sup> Juni unanepatun jawen jiwetan  
piti inun xeni intinti inun mabu pepa shadabu ichawatan  
unanxubida me pewakubaina  
jawan mabu jawaida keyutidumaki.  
Jakia juni unainsmapatun jawen jiwetan  
piti inun mabu pepa ichawabiatan  
meke pewama jawaida puta puta amisbuki.
- <sup>21</sup> Tsuada jiwei pekaini  
ana chakabukatsi ikama  
pepa bestikin jatu uinmaiwen taea  
jakidi jancha peaibu ninkai  
jaska jiwea bechipaimis jayaxanikiki.
- <sup>22</sup> Maewan anu xanen ibu detenamenika kushipabu ichapa jayabiaken  
unanepabun jatu maematidubuki,  
jatun mae mishki kushipawen kenebaunibu jaki chiti ibiabun  
jatu bedankin keyunkinan.
- <sup>23</sup> Tsuada jadi shinain janchakatsi  
bebunkidi shinan pewatan  
jawan jancha pe kainmamisdan,  
jamapai chakabuwaismawen taea  
jakidi shinan chakatidubumaki.
- <sup>24</sup> Jawen unanepa inun jawen tapinika janchawen kein  
betsabuki kaxekin jatu kenamamisbudan,  
“Ja juni jamen uinbain yui chitenamei jancha bestimiski”, akin  
yuimisbuki.
- <sup>25-26</sup> Chikishbu xaba betsation  
dasibi jawadawen kemui bechipai jayakatsis ibiai  
daya shinankin bechipaisbumaki.  
Jakia tsuada pepa chikishmatun  
juni betsaa nuitapaibuwen nuikin  
jawan jawada jatu inankubainmiski, yaushiamadan.
- <sup>27</sup> Juni chakabubun shinan chakabiakin  
Jehová daewanun, iwanan,

inabu xeni jatu kuamakin  
 ja juni chakabubun inanbiabu  
 Jehován jatu danankin bechipaismaki.

<sup>28</sup> Juni chakabubun jawada uianma  
 inun uinbiai chani besti unainbu  
 jatun dakewen taea mawaxankanikiki.  
 Jakia jawada ninka pewatan unainbu  
 unanti wanikabun jatu yukabu  
 xabakabi jatu kematidubuki.

<sup>29</sup> Juni chakabubu datebiai  
 bemakis mesten pe itsai mapumisbuki.  
 Jakia juni pepabu jawa shinan  
 chakabuwaismawen taea  
 dateama jiwekubainmisbuki.

<sup>30</sup> Unanepa inun, tapinika jancha inun,  
 yubakai penikan  
 jabun Jehová yuibiakin binukin maematidubumaki.

<sup>31</sup> Jawen detenameti pewakin  
 junibun jatun caballo bebunkidi tapinmakin unanmamisbuki.  
 Jakia detenameaibu kushipa wakin  
 Jehován jatu medabewakin binumamiski.

**22** <sup>1</sup>Oro mane inun plata mane midima jayabiabun  
 pepai min jiwekunkainai inun  
 dasibibun kaka pepa mikidi yuibaunaibudan,  
 ja mane kadu shadabu min jatu binujaidaki.

<sup>2</sup> Mabuyabu inun mabuumabu  
 ja dabe Jehován matu dami wanidan,  
 betsama man jabiaska dabes jawenabuki.

<sup>3</sup> Tsuada bebunkidi shinan pewanikabun  
 jawada mese uinkin dunkekubainmisbuki.  
 Jakia tsuada bebunkidi jawa shinainsbuman  
 mese uinbiai ninkamas nakubaini  
 jamapai shadabu bika tenekubainmisbuki.

<sup>4</sup> Jehováki mesekin jawen jancha ninkai

jawa keinsbuma pe jiweaibuwen taexunan,  
 Jehován jatu manakukin mabuya wakin  
 jawenabu jatu kenwanmakin  
 jatu pe jiwemakubainmiski.

<sup>5</sup> Juni chakabubu jiwekubaini mapukinan,  
 jawen jatu ichakawakin bepadanaibu ichapa uinkubainmisbuki.  
 Jakia tsuanda ibubis jawen jiwea pe mekekubainkinan,  
 jawada chakabu tibi dunkebainmisbuki.

<sup>6</sup> Na jabiatian matun bakebu tapinmakinan,  
 yusian pepawen jatu akanwen.  
 Chipu ewatan jaska min jatu yusini  
 jawa jene taskama mestebuyabis jawen jiwekubainxankananikiki.

<sup>7</sup> Mabuyabu xanen ibukin  
 jabu nuitapaibu jatu yunukubainmisbuki.  
 Tsuanda jatu pei bianyumisbun  
 jabun dibiabu jatu dayamamisbuki,  
 jawen tsuma keska watanan.

<sup>8</sup> Tsuanda chakabuwakubainkin  
 chakabudi tenekinmekubainaibun  
 januxun Jehová jatuki sinatakin jatu yamawaxanikiki,  
 jawen mestenti kushipawen jatu kushakinan.

<sup>9</sup> Tsuanda nuitapaibu uinkin jatuwen nuikin  
 jawen piti jatu paxkaxunkin  
 jatu inankubainmiswen taexun  
 Diosun jabudi uinkin jatu duawaxanikiki.

<sup>10</sup> Enjen iki yuda betsabuki kaxemisbu  
 mae anua tsuanda man jatu nichinxuna  
 ja jabe ja iki yupukunanmisbu mainxankananikiki,  
 ana janchawen tsua detenameabumadan.

<sup>11</sup> Tsuanda jawen shinan chanima uinmakin  
 duapa janchawen xanen ibu janchakin benimawaibu  
 xanen ibu pepatun jatu bechipaijaidakin  
 jatu jaibuwamisbuki.

<sup>12</sup> Jehován unanepabu jatu mekekin jatu uinkubainaya

chani chakamisbun jatu yuikin:  
 “Chanima nun matu yuiaii”,  
 ibiai chani chakaibu  
 Jehován jatu xabakabi kayati wamakin  
 jatu unanti wamamiski.

<sup>13</sup> Chikishi jawaki bepadametima  
 dayakatsi ikamawen taexun  
 jawenabu padankin yuikin:  
 “Bai namaki inu betsa león manakananmiski.  
 Eki nukutan ea pitiduki.  
 En jawa kamaki”, ikin yuimisbuki.

<sup>14</sup> Ainbu jininipatun jawen janchawen mia kemumaidan,  
 mai kini keyatapajaida keskaki.  
 Jaskawen taea janu Jehován tsuada ma yupua  
 tin imisbu anu jatundi janu mia iyutiduki.

<sup>15</sup> Bedunanbun shinan pepa unanmadan,  
 unainsmapatun shinan chibain patapakubainaibu  
 januxun jatu pewakin jatu kusha kusha akin  
 ninkamakin jatun patapa jenematidubuki.

<sup>16</sup> Juni mabuyabiakainkin  
 mabu inun pei ana binun, iwanan,  
 nuitapaibu jatu ichakawakin  
 mabujaidayabu besti jawen mabu jatu inankubainmisbudan,  
 chipu jadi nuitapaxanikiki,  
 ana mabu inun pei jayamaidan.

\*\*\*\*\*

### Xanen ibujaida Lemuelin unanepa janchakiaki, na janchadan

**31** <sup>1</sup>Eska jawen ewan yusian ninkanixun Masá anua xanen ibujaida  
 Lemuelin jatu kenemakubainikiaki.

<sup>2</sup> Kukaan, Dios en yukakubaina  
 ea ninkatan Diosun mia ea bimaima  
 en mia kainiwen taexun  
 ¿jawa ana betsa mia yusinpa?

<sup>3</sup> Eska mia yusinun ea ninkaidawe.  
 Ainbuaibuwen kemukunkaini  
 xanen ibukin jatun kushipa benumisbuwen taexun

ainbuai bu chutakubainkin  
min kushipa benuyamakubainxanwen.

<sup>4</sup> Kukaan, mia yuinun ea ninkawe.

Uva vino inun shia paepa ichapa  
xanen ibubu inun yununikabun akubainaibudan,  
jaska pemaki.

<sup>5</sup> Jaskaidan, paenxun nukun yunuti inun

jawen nemati jancha jakimatan  
nuitapaibu mekeama jatu ichakawakubaintidubuki.

<sup>6</sup> Ja shia paepa inun vino aki mawai inun nuitapaibudan,  
jau jabun besti anunbun nemayamaxanwen.

<sup>7</sup> Shia inun vino aki

nuitapai inun isin tenebiai  
jawa ana shinanma jakimatidubuki.

<sup>8</sup> Yununikabube tsuada janchapananbun

tsuanda jatu nemaibu mian jatu medabewakin ja jatu nuitapawaibu  
jatu janchaxunkunkainxanwen.

<sup>9</sup> Mia xanen ibutanan,

nuitapaibu inun jabu juni pepa  
jatu ichakawaibu jatu nemaxunkin  
yunuti pepa kushipawen unanti wakin  
yunu pewakubainxanwen.

**Ainbuai bu pepabukidi jawen juni bake ana  
yusindianikiaki, na janchadan**

<sup>10</sup> Ainbu duapa pepa bikatsi  
benabaunadan, bikajaidaki.

Jawaida jania min bechitidumaki.

Ja ainbu pepa jaska min bechitidudan,  
jamapai dauti kushipa jawendua kadujaida binujaidaki.

<sup>11</sup> Jawen benen jawen ainin jancha

jaki chiti ikin ikunwankubainaiwen taea  
jawen jamapai dasibi jawen jiweti jayakubainmisbuki.

<sup>12</sup> Xaba tibi jawen benimakatsi  
jawen bene pe shinanxunkin

medabewaiwen taea jawen jiwea jidabiwen  
jawen bene benimakunkainmiski.

<sup>13</sup> Chaxuwani dani lana inun

xapu pepa benakin bitanxun  
jawen jiwe anu bexun

- jawen mekenen dayakin  
 lana inun xapu tudu akin  
 yumen wantan timamiski, benimakinan.
- <sup>14</sup> Chaijaidakea jukin xaxu ewapawen mabu bemisbu keska wakin  
 chajaida ainbu kaxun piti betsya betsapa  
 jawenabu bixuntantamiski.
- <sup>15</sup> Penadiama butukain  
 jawenabu inun jawen tsumabu  
 bawaxuntan jatu pimamiski.
- <sup>16</sup> Janu yunuti bai binun ixun uintan peken  
 benimakin pei bikubainkin ichawashinawen bai bitan  
 jawen uva bai wamiski.
- <sup>17</sup> Jaska watan jawen kushipawen dayai  
 ibubis shinan chankain benimai dayakunkainmiski.
- <sup>18</sup> Jawen tsumabu badidi pe jatu dayamabai  
 jadi meshu medan dayakin jawen bin  
 jawaida nukawaismaki.
- <sup>19</sup> Januxun jawen mekenen ibubis yumen wantan  
 tadi wakin timakubainmiski.
- <sup>20</sup> Ja inun, jawa jayabuma nuitapaibu medabewakin  
 jaska yukaibu yaushiamma jatu inankubainmiski.
- <sup>21</sup> Jawenabu jatu matsi tadi waxuinmawen taea  
 matsijaidatian dasibi yabukui peabun  
 ainbu pepa jatuwen dateismaki.
- <sup>22</sup> Jawen dayadan, ibubis dakukuti wakin inun  
 bachi manyunepa jawendua watan sawekubainmiski.
- <sup>23</sup> Ainbu dayakapawen taexun  
 jatun mae anuxun jawen bene  
 dasibibun unankanikiki.  
 Ja dikabi jatun mai pakea jidabi anuxun  
 xanen ibubun jawen bene duawakin ninkamisbuki.
- <sup>24</sup> Ja ainbunan, tima tadi chaipa inun jawen nanexeketi timamisxun  
 jabu mabu inananainbu anu  
 jatu inanxun pei bimiski.
- <sup>25</sup> Bachi pepa sawea keska wakin  
 kushipa inun shinan pepawen shinain  
 meshukidi jawada iyanai shinain jawen nuikunkainsmaki.
- <sup>26</sup> Janchaidan, unanepa janchawen janchakin  
 jatuwen nuikin jatu yusinkubainmiski.
- <sup>27</sup> Jabe jiwerisbun jawada akubainaibu jatu shinankin  
 jawen dayawen piti jatu bixuntan  
 jatubetan pikubainmiski.

28-29 Jawen bakebu inun jawen benen kenwankin yuikin:

“Ainbu pepa ichapabubiaken  
mianan, dasibi min jatu binujaidaki”,  
akin yuikubainmisbuki.

30 Ainbu natian chipash jawen yuda jawenduabia  
jawen shinan min unanma jawen yudawen mia padantiduki.  
Ja inun, jawen yuda jawenduabia jawaida atimapatiduki.  
Jakia ainbu betsa Jehováwen datekin duawakin  
pe shinankubainai  
ja ainbukidi jawenabun kenwankubainxankanikiki.

31 Ainbu pepa dayakapabu mae anu ichaxun  
yuda dasibibun jau kenwankubainunbunwen,  
jaska jatu axunkubainmis shinankin yuikinan.